

語
孟
說
略

語孟說畧上卷

無錫顧憲成涇陽氏輯

學而時習章

論語一書乃聖人言語。與大學中庸孟子不同。大學一書必是帝王統做得。中庸孟子論道理精微處。必是聖賢統會得。常人皆有所不能也。聖人之言高下大小皆宜。即如學而時習之一章。常人亦做得。以之為聖賢。亦只是如此。其餘所記莫不皆然。語上而不遺下。語精而不遺粗。此所以為聖人之言也。徐敬弦

弟子章

餘力學文。文亦我也。專務於文。我亦文也。薛畏齋

賢賢易色章

前輩謂讀得一尺。不如行得一寸。亦子夏之意。子夏謂能是四者。雖曰未學。吾必謂之學。反而觀之。則不能是四者。雖曰已學。吾必謂之未學。矣。子夏之言。亦未可盡以為有弊。徐敞強

君子不重章

先正謂人最怕氣輕。氣輕最害事。不重即是氣輕。惟其不重。則志氣內亂。精神外浮。所以學亦不固。荆川先生云。學問之極功。雖足以變化氣質。而氣質之不美。亦足以為學問之累。是也。徐敞強

子禽問章

或與或求。易之義。求則得之。事之常。今云溫良恭儉讓以得之。則是但有一得字。不見其所謂求。亦不見所謂與也。徐敞強
聖門學者。淺深造詣。雖殊。宗旨知本則一。蓋皆不求之人而求。

之已。所謂不在人分上做功夫也。陳亢之疑。只為信不及此。渠但見得當時黃緣攀附之輩。乘危僥倖之人。多少費心勞力。曾不足以動邦君之一盼。而夫子轍環周流所至。輒蒙尊禮。下賢圖治之主。知其不多望於天下。而以為夫子之必有求矣。此處若不明本。須與他理論之。楚時夫子如何不曾求之齊時。夫子如何不曾求。周羅對證。如辨是非。不但夫子之心跡未易以明。而學問之旨。亦終於不明白矣。子貢却達此也。故不與他理辨是非。直從夫子身上點出溫良恭儉讓以得之。渾然太和元氣。盎然通理黃中。善戲謔兮。直認夫子作求。只是異乎他人之求。之。不曾在人分上著半點精神耳。至今千載而下。讀之猶可想見其氣味多少深厚。其識趣多少高遠。其度量多少寬洪。其感

乎多少神妙。詞說不繁。意有獨至。豈獨夫子。直自黃帝堯舜禹湯文武以來。相傳脉線。只是一個異乎人之求之。壹是皆以脩身為本而已矣。後之學者。只不明此。所以高鶩虛玄。卑流功利。抑誰識溫良恭儉讓之透體露心。渾然一天之命者乎。李見羅

禮之十章

和為貴之和。和於理。知和而和之。和於情。和於理者。與禮為一者也。和於情者。與禮為二者也。有子所言。是當時二弊。周末煩文勝質。不和於身心。使人不安。夫先王制禮之本意。當時有一等人。如莊周子桑扈之徒。以為禮之體和而已矣。不原禮之本。却於情處求和。一任情做去。遂至流蕩忘反。都與禮不相湊泊。如西晉風流一般。則禮法大壞。又如周末文勝。存得此禮。

之粗迹在。由此觀之。流與離均之失禮之本。而流之害則甚於離矣。故聖人雖教人興於詩。又必立於禮。乃成於樂。夫善善惡惡之真心。乃天理之本然。此固是制禮之原。然必有些把捉處。使情意不流。然後善端涵養漸。成熟。有子此言。所以救流與離之弊也。程子所謂敬則自然和樂。亦是此意。薛畏齋

君子食無求飽章

不求安飽。是為學之根原。敏事慎言。就正有道。是為學之條目。這個條目。當時凡為學者皆如此。只是安飽念重。根原處不潔淨。雖去敏事。亦是勉於外。雖去慎言。亦是強制於口。雖去就正有道。亦見他不到。只學得他皮膚而已。如此去學。學雖同。而非求之於心者也。安得謂之好學乎。薛畏齋

貧而無諂章

病痛都掛搭在氣質上。若無氣質亦無病痛。以其無掛搭處故也。貧而樂富而好禮。氣質消融者也。氣質既消。純是真性。真性之中。焉嘗有驕諂來。無諂無驕。是子貢氣質未消而禁其諂驕。則病根終在先儒所謂以石壓草者也。薛畏齋

諂驕是氣質上受病。氣質聽命於心。若心作得主。不使放心邪氣得入。則諂驕無從而生。而貧富之來。皆吾性分中物矣。夫子此言。是扶本塞源之論。省氣力的功夫。如子貢所為。費多少力。惜不足以語此。同上。

子貢引詩。非以是問於夫子。乃感悟自嘆之詞。徐徹弦

詩三百章

惡者可以懲創人之逸志。今人多疑此句未妥。陽明先生以為孔子所定三百篇皆雅樂詩。不刪鄭衛。此必秦火之後世儒附會以足三百篇之數。亦未必然也。徐氏曰。古詩三千。夫子刪之為三百。蓋十而存一。使果男女淫巧鄙褻之詞亦不刪去。則所刪者為何等語。即古詩如今之歌曲。里巷狹邪妖詞豔語。類能使人溺心蕩志。不可收拾。何曾見有懲創者。朱子後來刊定楚詞。宋玉神女之賦。登徒子好色之賦。陳思王洛神之賦。亦皆不錄。而謂夫子錄淫奔之詩以傳世。豈其然哉。故鄭衛諸詩說者紛。以為只從原序他有所刺為當。雖言有涉於狎暱者。不害其為主文而諷諫。卿大夫亦可歌之。朝會燕好亦可歌之。亦是情性之正。無戾于思無邪之旨。若以其詞涉狎暱。概指為男女

淫奔相贈答之語。則不獨鄭衛。即如南有女懷春。吉士誘之。求我庶士。迨其謂之。亦詞涉狎暱。而不得謂之無邪矣。詩在六經。別為一教。須得之於言外。此言似有理。於夫子思無邪之訓。更為直截。馬端臨論之頗詳。可并觀之。徐儼弦。

吾十有五章

此章是孔子自述其一生之學。在諸弟子不能深知。亦恐不能描摹到此。蓋衆人有衆人之學。學在希賢。賢人有賢人之學。學在希聖。乃聖人別自有聖人之學。學何為哉。合於天命之初而已。此章書者。來只重知天命一句便了也。志字學字不惑字。皆言下學所以希天上達之事。既知天命矣。何思何勉乎。耳順從心。只一團天機融貫。窮神盡化處。雖云聖人天縱不假學力。然

心靈湛如比之吾輩倍加兢業。如有細工夫。雖云直入聖域。不須層累。然心境歷然。比之吾輩大有精進。如有細程節。今人心上學力高一層。其苦力精進。尤加於他人。則聖人之自知必獨有至處。故自稱曰。世莫我知。下學而上達。知我者其天乎。子思子云。非聰明聖知達天德者。其孰能知之。此其際淵乎微矣。昔程伯淳言。十四五時。便思量做聖人。乃孔子十五時。便思量上學堯舜。近學文武周公。折衷百王。旁收羣籍。為萬古乾坤定一大中繩尺。此乃是孔師之志。孔師之學。而規規如所云格致誠正。志乎大學云爾者。此非知聖人之言也。志學如此。將這萬古大中之衡。實能出頭。在千聖座上。把得牢定。此乃孔師之立。非吾人所謂立也。把得權衡定後。自能貫串萬品。透徹精微一絲。

不謬。此乃孔師之不惑。非吾人所謂不惑也。如此精勤四十餘年。則天命在我。掌握矣。乃知從太始以前。有此混濛物。方能開天闢地。放出萬古世界。與我性靈一般。自然流轉。何嘗有一物之不備具在我者。又知人世。上安危治亂。人物種々。安全生養。皆混濛中分出。自足自圓。與我性靈相通。徹補救。裁成一。皆性中本分之事。並無一物放閑在範圍之外者。此知天達命。天人合一。物我同源。古今不隔之大宗指也。孔師到此地。愈神愈妙。縱耳之所聞。經訓羣言。皆天命之注疏。即鳥語泉音。靈根盡透。縱心之所欲。經綸刪述。皆天命之矩度。即身律聲度。左右皆宜。何聞之逆。而何矩之踰乎。故曾子得之明明德於天下。收之以絜矩之道。子思得之合天地。所以為大。收之以上律天時。然

則孔子時中。不出一律字。平均天下。不出一矩字。故吾師之學。雖起玄入粹。無聲無臭。而無一不歸之大中至正之矩。雖進退千古。自立錮范。而無一不約之三綱五常之律。洋洋乎。至今高出二氏百家。上為生民日用之所必資者。其矩矱而律度定也。辟之天焉。日月四時不差一杪。草木果實不差一候。元氣混濛間。至精至密。惟吾師之道之學。天壤與之同符。豈虛乎哉。嗟乎。大聖人之學。每一年一進。遂以七十年立此道於天壤。想其晝不食。夜不寢。發憤汗背大苦心矣。故每十年一倍神采。吾輩之學。朝更夕怠。日作月輟。未嘗有十年不變之功。加安得有十年大進之心境。此余每一思之。塊汗不覺沾裳者也。學聖人者。無他一意。以天命為宗。併力向前致。焉終吾身而已矣。沈長水說義

常人之學只是口耳於學。聖人之學却是志於學。口耳於學者。他所學只是資得口耳。聖人之學却是培養吾之良知良能。耳目感觸處無事不與吾心相通。盡天下之事物盡吾之見聞。此心此理無不與相湊相培養日久。良知良能日充。成了一個大人體段。如赤子之血氣充足而能卓立。故謂之立。既立之後。則事物之理備具於我。而耳目口鼻應用都是一理。感通無少疑慮。故謂之不惑。不惑處猶有知也。還是屬人到知命處則無心。無心則無疑處可言。其動處乃是一理流行。知天命之默運。而四時行百物生。蓋大而化之與不惑以下絕迹矣。耳順從心俱知。命中事無漸次亦無淺深。耳順者事都是理。不知有事也。從心者耳目口鼻都是心。不見心也。無事則無物。無心則無我。渾

是一個理。不感以下着得。加。知命以上着不得。加。薛畏齋
志從心生。心學乃能志於學。不是心學。只是口耳於學。聖人十
五歲以前。小學事都是實心去做。所以十五而志於學。見得天
下之事無適非心。志都通得去。亦是他小學時養得心明故也。
常人小學只是習其事。誦其文。而與身心不相湊。相到大來。只
是粘皮帶骨。雖目謂無所不學。其實與志不相通。只是增得些
助襲。辨博而已。同上

孟懿子問孝四章

前二章告大夫。一是循理。一是守身。其辭婉。後二章告門人。一
是敬親。一是愛親。其辭直。徐倣

吾與回言章

呂涇野曰。夫子於人。有不可與言者。有欲無言者。有與言終日。而自。有許少多等級。不似今人。逢人開口。便道一貫也。又曰。要知終日所言者何事。徐敬德。

要看得發字意。出所謂發者。如草木生意。充滿勃鬱於中。而暢茂條達於外。謂之非造化之力。則不可。謂之盡出於造化。亦不可。同上。

胡氏曰。此一發字。最有加。夫子嘗曰。語之而不惰者。其回也。與。情則不發。發便不惰。孟子曰。有如時雨化之者。先儒以顏子當之物。經時雨便發。顏子一聞夫子之言。便足以發。故周子曰。發聖人之蘊。教萬世於無窮者。顏子也。同上。

吾與回言終日。不違如愚。口耳皆心也。起予助我心。亦口耳也。

泥口耳則非心。離口耳亦非心。學者當有得處。薛畏齋

聖人無異教。其與回言。與他人言。都是一般。至領悟處。存乎其
人耳。但平日以口耳為學者。悟之以口耳。只是說過於身心。無
得。故曰助我。曰起予。若以心學者。悟之以心。言言皆得之於心。
言與心不相背。何言之有。故曰不違如愚。曰語之不悖。曰無所
不悅。吾與回言。終日不違。是聖人無言處。亦足以發。是顏子有
言處。知顏子之有言。則知聖人之無言矣。同上

違者。心不受也。平日不是這個學問。故不受之心也。惟心學者。
無所不受。顏子是也。其餘或待其能受而後告之。曾子是也。或
扶出他不受的根苗。而後啟其受。若子貢是也。這不受的根苗。
諸弟子通病。但子貢其後猶能受。其餘則終不受耳。同上

君子周而不比章

夫子說君子周而不比。和而不同。而易卦乃有曰比曰同者。何也。蓋易之比乃一陽為衆陰所比。而陽居五為得其正。是其比也。乃所以為周。同人乃一陰為五陽所同。而陰居二為得其正。是其同也。乃所以為和。徐徽庭

學而不思章

學而不思。是謂狗物。狗物者不通於理。口耳之學也。思而不學。是謂絕物。絕物者不安於身心。空虛之學也。學術大蔽只此二端而已。薛畏齋

攻乎異端章

愚嘗謂有天地以來百般學問。皆起春秋戰國之時。不惟中國

有許多人出來維佛氏亦生於西方此亦天地運氣之一會也
所以後來有咸陽之一炬律微弦

由誨女知之章

子路是個聰明才辨的人他於事物上都信口說得去若反求
諸心有多少不安者在夫子若欲事之救正如何賣得許多加
故就他根本處教以知之道根本者心也蓋在耳目上論必
以無所不知為知若在上論只是知得知與不知處是知既
不知處亦是知則雖一無所知而吾之知固在也何必一於知
也若必以無所不知為知而於其所不知者亦強以為知是以
耳目役心知愈多而心愈蔽力愈勞而知愈遠矣從此有蔽之
知做去有多少害道在如以正名為迂如何成得國以治民事

神為學却不誤了子羔。若此者皆由他平日以無所不知為知。連那心上的知與不知都不知也。故夫子指出知之真切處與他說欲其反而求之曉得知心上事。反求諸心則知不知處都瞞昧自家不得。而於此等語自不敢說矣。不禁之禁也。薛畏齋凡心地明則聞言皆受益。若心地不明雖聞言只作泛常說過或因而役志累心。夫子此言亦為子路受言之地也。同上

子張學干祿章

聞見豈能牯心。心自牯於聞見則有之。譬之飯食。然有病之人一切美飯食皆成痞悶。然飯食奚罪。彼自有病耳。若無病之人飯食便能消化。自然膚革充盈。徐敬修

子奚不為政章

方山先生曰。昭公為季氏所逐。薨於乾侯。六月癸亥。喪及壞。饋
戊辰。定公即位。又從季氏之役。葬昭公于墓道南。俾不與魯先
君同兆。孔子不仕。而以孝友答或人之問。意者其在是時也。及
觀其為魯司寇。卒。溝昭公之域。而合諸墓。則其初年不仕之意
可知也。徐敬弦

陽貨懷竇。迷邦之問。想亦與此同時。初年則人疑其不仕。晚年
則人疑其不隱。夫子之心。亦無以白於天下矣。同上

子張問十世章

聖人一言。盡古今之變。暴如秦。亂如五代。夷狄如胡元。而因革
之大致。不能易也。徐敬弦
持禮字。當是指隨時制作之禮。聖王迭興。雖各有所制作。然不

能不用前代禮文而損益之。如曰夏殷之禮吾能言之。又曰吾學周禮。又曰周監於二代。皆指禮文。不指三綱五常。以三綱五常為禮。不知馬氏何所據也。同上

孔子言所因所革。世百世可知。孟子言天下之生一治一亂。皆萬世不易之定論。同上

見義不為章

昔夫子有感而歎。吾未見剛者。或對以申枨。子曰枨也慾。焉得剛。只此五個字。斷盡了天下人。夫錫多則卷金。且失堅。豈有慾而能剛之理。又嘗觀慈湖之語西山也。曰希元有見道之心。乃未能忘富貴利達何也。西山愕然。請問慈湖。曰子嘗以命訊日者。故知之耳。功利中人。如油入麵。絲毫縈絆。力敵萬鈞。雖有關

於宗社安危生民休戚如一指蔽目泰山為之不見矣此孔子所以謂見義不為無勇也推原其故豈有他哉則以秉志之立操合下來不曾判決得清楚以致當機履局不免雜於利害而計只一雜於利害便是兼帶了世情而義之分數畢竟輕利之分數畢竟重矣雖欲勇於為義其將能乎伯夷非所謂聖之清民到于今稱之者乎然一頭放着個千乘一頭放着個餓死甘守餓死不顧千乘此其節所以竟立比于非殷之宗臣孔子之所稱仁者乎然一頭放着個國相一頭放着個剖心甘棄國相直趨剖心此其道所以終勝他日因子貢必不得已之問謂於去食去信將何所先曰去食自古皆有死民無信不立嗟乎此可以斷千古為義之勇矣古稱死有重於泰山有輕於鴻毛等死

耳何以重比泰山。則天經地義之所維持也。世道人心之所回
幹也。此其所以重也。則伯夷比干是也。等死耳。何以輕比鴻毛。
則狗彘蠅營。趨利趨名。往而不知返也。合汚同流。朝昏苟度。如
鳥獸草木之等。時漸盡而莫知。尋繹也。此其所以輕也。則千駟
之齊景萬斛之元載。與蠶、蚩、者皆是也。彼其初未嘗無擇
也。特其甘棄義。庶利之有獲也。畢竟所獲何多。甘處不義。謂害
之可避也。畢竟害孰為甚。此愚所以謂果其求仁而得仁。怨亦
是仁。果其欲仁而得仁。貪亦是仁。必如是而後可以判見義必
為之勇。李見羅

孔子謂季氏章

先王制禮樂以正上下。杜陵僭豈能人。而禁其不為亦足各

人。心。上。自。過。不。去。故。不。為。也。只。這。過。不。去。處。便。是。禮。樂。之。本。原。
人。極。所。以。立。者。賴。有。此。耳。若。此。心。一。喪。則。誰。不。可。為。者。所。以。李。
氏。至。於。僭。八。佾。為。忍。心。之。甚。也。尚。何。禮。樂。之。有。薛畏齋

古。之。亂。臣。賊。子。至。於。弑。父。與。君。其。原。皆。生。於。一。忍。字。夫。子。於。李。
氏。特。以。是。可。忍。也。責。之。盖。亦。誅。意。之。法。也。陸敬弦

東萊呂氏曰。儒者之議禮。每力爭於毫釐尺寸之間。如天子之。
席五重。諸侯之席三重。所爭者。繞耳重耳。天子之堂九尺。諸侯。
之堂七尺。所爭者。繞二尺耳。由庸人而觀。天子諸侯之分。豈再。
重之席二尺之堂。所能抑揚。何儒者之迂耶。大堤雲橫屹如山。
出其視尺寸之土。若不能為堤之損益。然水潦暴至。勢與堤平。
苟有尺寸之土未浚。則瀕水之人。可恃無恐。當是時。百萬生靈。

之命係於尺寸之土焉。尺寸之土可以過昏墊之害。尺寸之禮可以遏僭亂之源。然則儒者力爭於毫釐尺寸之間。非迂也。勢也。同上。

三家者章

謝上蔡云。八佾舞於庭。不仁者之所為。以雍徹不知者之所為。禘自既灌而往。吾不欲觀。諷魯之詞婉矣。取於三家之堂。譏三家之詞切。徐斂注。

朱子曰。使魯不用天子之禮樂。則三家亦無緣見此等禮樂而用之。此程子所以獨歸咎於成王。伯禽賜受之非也。按魯惠公請郊禘於平王。平王許之。然尚未之舉。至僖公之末年始舉之。此見於呂氏春秋。司馬遷史記之矣。是成王未嘗賜伯禽未嘗

受也。夫成王在襁褓，周公遂以道義教之，伯禽同學，亦與聞之。古今所謂聖賢之徒也。曾不知名分所在，遂以之賜以之受乎？大抵東遷之際，王迹熄而綱常紊矣。故惠公敢於請，而平王遂與之。使誠為成王之賜，孔子之春秋可據也。歷隱桓莊閔僖凡五公，幾百年，至僖公末年始郊，又以不吉而罷。何其疎濶如此。魯頌閟宮亦誇誕之詞，但足以證郊禘非成王之賜也。其第二章曰：王曰叔父，建爾元子，俾侯于魯。大啟爾宇，為周室輔。下章惟云：乃命魯公，俾侯于東，錫之山川，土田，附庸而已。未嘗言賜郊禘也。此下即云：周公之孫，莊公之子，龍旂承祀，以往郊廟而已。即此觀之，可見僖公以前未嘗郊，封伯禽之時未嘗賜也。使為成王之賜，宜世世行之。何直至僖公而後舉，叙封之詞山川土

田附庸皆及之於郊禘獨遺之耶同上

季氏旅於泰山章

季氏若知泰山之不當旅則知君之不可僭此聖人開導之微機也惜冉有不足以語此薛長齋

季氏旅泰山是自欺其心誠不具矣其所具者特儀文而已禮不在儀文而在誠誠就是禮之本當周末文勝林放生其時獨覺其非此是他心神虛文罔他不得處今季氏不以禮事泰山而以虛文事泰山若泰山享之是為季氏所欺不如林放生也推此類凡不合於禮不安於心者却是以虛文自欺不能欺人也季氏專魯其欺人處多矣若能於此言有省有多少進益同上

巧笑倩兮章

六經皆稽實待虛之詞不特易教為然也今之讀詩者以某章之詩為某人之作而詩學亡矣看子貢子夏論詩二章可以得古人讀詩之法徐敬強

黃厚齋曰逸詩篇名若程首驪駒祈招樂之柔矣皆有其詞惟朱薺河水新宮茅鴟鴞飛無詞或謂汚水河水也新宮斯干也鴟飛小宛也周子醇樂府拾遺曰孔子刪詩有全篇者驪駒是也有刪兩句者月離于畢俾滂沱矣月離于箕風揚沙矣是也有刪一句者素以為絢兮是也考之周禮疏引春秋緯云月離于箕風揚沙非詩也素以為絢兮朱子謂碩人詩四章他章皆七句不應此章獨多一句蓋不可知其為何詩然則非刪一句也若全篇之刪亦不止驪駒

愚按三百篇之詩皆樂章也。被之管絃匏竹之間者也。或為宮。或為商。各有音調。即如今之歌曲一般。若刪去一句兩句。便不成調矣。非若彼文字者之可刪而節之也。周子醇之言誠不諳詩之旨矣。

商賜可與言詩。此聖人達才之教也。起予助我。無所不悅。是當時兩般學問。無所不悅者。得聖人之心。起予助我。都得聖人之言。蓋總是一般說話。學者看兩樣。若聖人則無行不與。非有隱也。薛畏齋

夏禮吾能言章

孔子生周之世。知生今反古之為非。而屢思夏殷之禮何也。蓋周末文勝。思夏殷者。所以思周之舊也。周監於二代。夏殷之禮。

猶存。至末而夏殷之禮蕩然矣。孔子所以興思而屢歎也。律微夏殷之禮杞宋既不足徵。夫子何以能言之。呂注野曰。禮失而求諸野。當時老聃長弘之徒亦庶幾有傳者。故夫子能言之。按左傳杞夏餘也。而即東夷故不足徵。

禘自既灌章

禘而繫之魯。不待貶詞而惡自見矣。且父母之國。又不可顯言者。聖人一言一字之不苟如此。故不可專重既灌也。周禮在魯而乃僭禮若此。夫子魯人。深有感於心。故發此歎。他日作春秋亦因禮之變而書。或以一。或以望。或以牲。或以牛。皆失禮之中又失禮者。亦歎既灌之意也。律微

或問禘章

朱子曰禘之意最深長如祖考與己身未相遼絕祭禮亦易理會至如郊天祀地猶有天地之顯然者不敢不盡其心至祭其始祖已自大段濶遠難盡感格之道今又推其始祖所自出而祀之苟非祭理之精微盡誠之極至安能與於此故知此則治天下不難也此尚明得何況其他此尚感得何況其他夫子曰不知者以或人不能知此而辭之也以魯不當有此而諱之也魯不當有此則不得言禘之意或人智不及此則不得言禘之義也徐徽弦

祭如在章

儀文非祭如在乃祭也不得致其如在之誠是不祭也所以必須與祭

王孫賈問章

夫子對王孫賈只說一個天字便壓倒了與與竈朱註云天即理也詞氣似覺稍緩徐倣弦

不消在與竈上較量輕重只這一媚字便自有愧於心獲罪於天處無所禱猶云心病難醫也薛畏齋

周監章

周監於二代不是以文去損益忠質損益忠質故文耳忠質文亦自後世名之當時夏亦不自以為忠商亦不自以為質周亦不自以為文也蓋其說出於禮記漢儒附會之言而非孔子之定論也徐倣弦

此章可與夏禮吾能言之一章參看一是歎二代文獻之不足

一是美有周人文之可徵而深傷周禮之墜不得如先進損益之初蓋恐當代之如杞宋也

白山倫氏曰天下之生久矣自洪荒以至於黃帝堯舜風氣漸開人文漸著天下無一日而不趨於文此勢之自然而理有所必至者等而上之結繩之世則虞夏為己文等而下之商周之世則虞夏為己質文質相形而世道之變盡於此奚事於忠與敬也夏商之衰天下日入於浮靡惡有所謂民蔽而愚而野也哉武王克殷反商政由舊湯之績禹可知也皆自文而復之於質惡有所謂救野以敬救敬以文者哉中古之文極盛於武王周公之時不能不為之事制而曲防於是繁文縟禮生焉雖然為之度數品節使天下無過乎文而已矣誠知天下之文不

可勝救而質不可以卒復故以大聖人之質而酌天下之文庶
幾可以久立而無敝天下習見其文而遂以為尚文不亦惑乎
武王周公之不以文率天下亦明矣夫子之從周也猶其從先
進也故曰周監於二代所損益可知也曰監則有因革存焉曰
損益則非徒增飾之而已贊之曰郁郁若贊堯煥乎其有文章
焉耳惡得借夫子之言而謂周尚文也哉又曰草昧之初天道
改物生民雜處智勇俱盡碩果不食真精固完若小開闢然此
文復為質之機也善知時者及是而保合太和使天下無失其
質而可矣然而不數十年而天下已趨於文矣世道之循環自
文而質者不十一自質而文者常十九也敦質以約文猶懼其
不勝而又奚循環之有乎武王周公蓋將求虞夏之質而未能

今乃曰虞夏求周之文而未至何其昧於時義而敢於誣民哉

子貢欲去章

聖人看器處就是道。餽羊處就是禮。不以羊視羊。而以禮視羊。更無精粗隱顯之別。此所以教子貢也。薛畏齋

苟志於仁章

志仁則無惡。若不志仁。則欲為善。又有惡以為之閒。欲為不善。又有羞惡之心。從此一念悠々不真。便悞了一生。徐敬強

富與貴章

無終食之間違仁。言無一時不依乎仁也。下二必字。正見其不違處。上二節是就濶大處看。君子此一節却說入細密處。去前重兩不字。後重兩必字。徐敬強

富貴貧賤是仁之兩敵故貪富貴厭貧賤是去仁之兩案單食
瓢飲不改其樂所以仁存厭貧賤仁不存矣浮雲富貴仕止久
速一切斷之以通所以仁存貪富貴仁不存矣此蓋聖人揭出
顯然之公案以看天下之學者口未嘗不悅仁只一到富貴貧
賤失得交參之際便墮體黜聰現出本相世間固無有不仁的
君子然亦烏有貪富貴厭貧賤之仁人手故曰君子去仁惡手
成名渾身是欲體湊底無有仁而尚以稱於天下曰君子誰則
信之聖人辭氣雖平意殊切至玉未琢前猶索辨金經煅後更
何疑煅而流以冒稱為君子者吾見亦多也此雖勘之已清猶
恐體之未密說個無終食即自朝至暮念此仁矣說到造次
必於是顛沛必於是則無久暫無常變此仁矣大哉乾元萬物

資始。至哉坤元。萬物資生。豈有毫髮間斷。故聖人繫象於乾曰。天行健。君子以自強不息。看來無別巧。只有自強兩字。是仁之命脉。便是富貴貧賤之對頭。人生中所遭值件。有之。非富貴則貧賤。非造次則顛沛。若不靠得自強。如落絮遊絲。管取拖泥帶水。故惟自強。乃能不息。果不息。即是仁矣。李見羅

我未見好仁章

好仁者。至於無以尚之。惡不仁者。其為仁矣。不使不仁者加乎其身。味此語。是何等用。加徐敬強

有能一日用其力於仁。所用之力何力也。猶曰吾力不足。便是騎驢覓驢。

此章首言仁之難得。中言仁之可為。末言仁之可為。而人自不

為反覆歎惜皆於三個未字見之

一日用力於仁此真心好惡者也真心好惡不問氣質故力無不足所謂志之所至氣必至焉者也常人非無一念好惡之真如怵惕於孺子之入井不受嗜蹴之食此真心也但不能常如此及至他事又被氣質奪了外物遷將去這個念頭終是不得力須是常如此一去永不回頭這氣質纔聽他指揮奪他不得纔是力足所謂一日用力於仁者也與一日克己復禮之一日同都是到頭說話蓋平時暫退暫進之心到此日已永絕了不是到此日方奮發起也薛畏齋

君子之於天下章

無適也三句文勢接得甚緊是一連的若分為兩截則所謂無

適無莫者未免出於有意而所謂義之與比者亦為屋上架屋
矣徐倣弦

君子懷德章

懷德是無為而為善懷刑是有所畏而不為惡懷土雖未能遷
善亦未為惡也懷惠則無所畏而為惡矣懷土則惟溺所安而
忘其所謂德懷惠則惟利是逐而不顧其所謂刑懷德懷刑其
為善也雖有淺深之不同而同出於公同歸於君子也懷土懷
惠其為惡也雖有淺深之不同而同出於私同歸於小人也安
土則謂之君子懷土則謂之小人懷者意所便安安者無入不
自得也徐倣弦

放於利章

放於利而行則有貪一身之利而貽千萬人之害者貽千萬人之害則千萬人之怨叢之矣有徂一時之利而基千百年之禍者基千百年之禍則千百年之怨歸之矣故曰多怨徐敬強

參手章

要曉得是夫子之道要曉得夫子之所謂一者如何今之人開口便講一貫而究其所謂一者則茫然無所見何濟於事故必有聖人之神明而後可以語一貫有曾子之學加而後可以唯一貫不然盡皆空說終非實際也蓋曾子之未唯則三省尚有不足既唯之後則一貫亦為刺語此固有無關於口耳者在也徐敬強

夫子一貫之道在顏子則可以無言在曾子則不待於多言在

子貢則必待於言。

承示詢及曾子子貢聞一以貫之。指有異耶抑無異也。夫一以貫之則一耳。分知行者俗說之謬也。聖門如曾子至沈篤矣。資性頗鈍。故超悟之機少。層累之力多。夫子呼而覺之曰。參乎。吾道一以貫之。豈有許多節次哉。此掃其一向胸懷間層。級。級直與以一條覺路。一以貫之云者。為曾子踐徑設也。子貢聰明博達。耳目常支離於聞見。欲如顏氏之超悟。真隔重山絕陸。不能捨筏凌風而徑度矣。夫子呼而詰之曰。賜也。以我為多學識之者乎。而非也。此掃其一向胸懷間枝葉。直示以本來靈根。一以貫之云者。為子貢踐徑設也。向非二子者。受病在用力之中。亦不出此等話頭提訓之矣。然二子向來積習凍釋冰。

融一言盡解乃夫子直自任曰此一貫者吾之道自如此又云
予非責多者予一以貫之分明不與他人共此物矣即所云惟
我與爾有是夫之指也然則聖人之道豈難知哉聖人虛負融
徹之心即吾人純一不雜之心天與神明定無二印扣之即靈
觸之即動周徧萬事而此心無弗達含攝萬理而此心無弗通
行乎天下國家經緯變化而不踰一實考之六經羣言貫串該
總而不礙其虛入數入微八方孔遺路大通徹頭徹尾針芥
鋒芒一齊都了人若一夕恍然得此靈通消息真個是天下極
樂無上菩提也豈不快哉予貢他日問終身可行子曰其恕乎
只一恕可以終身行之忠恕之無不貫何疑焉孟子得曾氏之
學他日曰博學而詳說之將以反說約也反約之途乃取詳博

中多學之貫於一。又何疑焉。故自堯舜言惟一。伊尹言克一。一之說自古聖人已記言之。乃一之所以貫。則出夫子提撕後覺之深衷耳。其意若曰。而前十變萬化者。皆此件所為貫串。若無此件。特散索不收。拾若不能收拾。總十變萬化。則此件物亦塊然形器耳。試想天壤間色々形々。若無神理。何以能不言不笑。物々精神。吾人日應萬端。若無主持者。何以能伸眉吐氣。一撥便轉。千古以來。世風搖蕩。若無元陽在中間運旋。何以能太守持平。到今一絲不動於此。透入不消層累。直入聖境。不費勤求。單提法眼。故云其物不貳。又云易簡而天下之理得。只如此盡之矣。世之儒者。猶溺舊聞。牽性稟多。築層階。常在淖泥中。於泥廣添雜物。飽貯一腔。自以為得新安正派。惜乎不見正於仲

尼之門令灑然即天庭而睹白日也。鄙淺如斯以質大雅兄當盡力發我節蒙幸乃得之言表矣。沈長水與滕學憲少松兄書

君子喻於義章

君子但曉得有個義於中亦得了義的滋味更不復計所謂利也。小人但曉得有個利於中亦得了利的便宜更不復計顧所謂義也。徐敬修

張南軒曰無所為而為者皆義也。有所為而為者皆利也。朱子深有取乎其言。今學者雖是為善若有一毫求利之心雖做得好亦只是人欲之私與君子之心天地懸絕。同上

見賢思齊章

見賢固思齊然非未見時先有一個為善之心則見時豈能思

齊見不賢固內自省然非未見時先有一個去惡之心則見時豈肯內省今人見賢者不羨之則忌之或又病其可憚而遠之與見不賢不訾之則笑之或又樂其可親而狎之矣皆由為善去惡之志不素立

徐敬弦

事父母章

程氏曰人合者以義故君臣曰信而後諫天合者以情故父子曰悅則復諫

徐敬弦

古者言之不出章

纔開口便覺難這道理纔是身心上體貼過去古者言之不出蓋以此耶

薛畏齋

事君數章

事君交友之間不能以誠感其心而數數焉取必於言辭乃所謂煩瀆取辱取疏之道也。但子遊之言未盡。須如夫子之告子貢。忠告而善道之。不可則止。無自辱焉。其理乃為完備。即忠告善道者誠也。薛畏齋

事君不特以言數見辱。其或輕身枉道。文繁意薄。是亦數也。亦足以取辱。交友亦不特以言數見疏。其或聚居狎見。忘德思怨。是亦數也。亦足以取疏。事君不可數也。而父母有過。則號泣而隨之。朋友不可數也。而兄弟有過。則涕泣而道之。何也。思義不同也。徐敏彥

子使漆雕開章

斯字論語中多有此等字眼。如智及之之字。一樣學者須要理

曾若云指此理而言便是贅語徐敬弦

漆雕開最見得學問源頭的確蓋信者信此心也如仕而為仁須是仁心出之方可信吾之有任仁而為義須是義心出之方可信吾之有義若只恃聰明才辨做去外面做得好亦只是思慮勉強之私而非感通順應之真心與聖門之學只是從事於心開平目見得還是有我之心不是感通順應之心仁義禮智之德尚非已有應用處信此心不得所以不肯出仕可見他用心於內與諸子之用心於外者不同夫子所以說之也薛畏齋

孟武伯章

夫子於由許之治賦而曰不知其仁也於求許之治民而曰不知其仁也於赤許之治賓客而曰不知其仁也夫子雖不言仁

而玩味於三言之外亦可以識得仁體徐敬立

女於回也章

顏子知十。孔子多能。都盡他分量。不得向上更有在。薛畏齋
回賜二子高下。夫子素曰洞知之矣。何乃有孰愈之問。不曰不
如。却曰孰愈。試其自如何。如賜直曰何敢望回。則明謂之弗如。
矣。夫子喜之曰。汝真弗如耶。此弗如之心真心也。知弗如之心
即是真知。真知一朗萬竅皆融。無一無二。亦無十合。下心體直
與日月並明。十聖合符。豈待他日方進乃始。如回乎。即今一瞬
靈明轉變。便已如回矣。無知無不知之本體。無層累階級可設。
此一了即了之道。余聞近谿羅先生之教如此。道本空洞。超乎
對偶數目外。有對偶數目。則不徹。象山一日問同學。知二知十。

何以見得弗如其人對曰看來只是尚嫌少在象山為之首肯者久之陽明他日論學時時為同志者重宣此義良知之指不言了然僕意亦如二先生之教但愚見以為賜不如回者一則是徹底洞然一則尚靠揣量億度所以弗如其分別正在此處若自家見得如此分明即便徹了世豈有自知其為揣量對待猶不起脫者乎豈有自知不如回之徹底洞然而猶不洞然者乎所以夫子與之者不是與其他日向進與其當下直見性明心則億中之伎倆貨殖之營為合下盡消到空空去矣大凡天下事物千百總襍曲折奧渺即聖人不能徧知必須諮訪必待終日終夜精思必採納衆流之善酌之調之方能經時濟物獨其天性中一點真明合下廓然無碍無首無尾無所不貫故謂

之間一知。一者數之始。九者數之究。至於十則子數盡而還其母矣。聖人真知得母知子。既知其子。仍還其母。本體朗如吾人。落在是非利害毀譽成敗中間。纏綿算計。不出兩頭對待外。亦何超朗之有乎。故云回也。屢空。到十數上是盡頭歧路。故云空也。屢者如貧子。再無長物也。億則屢中者。我實流失揣摩他寶。曾得為吾有乎。故大舜用兩端之中。用之則非兩也。一而已。孔子扣兩端而竭焉。既竭矣。何兩之可言乎。故真知只是惟一。一則統體具存。頭足皆完。知之亦知。不知亦知。不知不知。却知。今人真知不出者。以其胸中尚有二物之介也。沈長水答陸生

宰予晝寢章

蔡氏曰。聖人之心如天然。天運無一息之停。聖人之心亦無一

時之間冬乃天之夜夜乃人之冬天閉藏於冬而人宴息於夜動極而靜靜則復動亦無間可容息也聖人以生知安行之資尚發憤忘食樂以忘憂不知老之將至尚終日不食終夜不寢以思其好學之功至於如此況學者無聖人萬分之一苟不愛日惜陰黽勉進脩而悠々度日則四五十而無聞終歸於下達矣如何而不責之深徐敬弦

夫子之文章章

夫子之言性曰性相近也習相遠也只兩言而後世性善惡紛紛之論俱為剩語夫子之言天道曰天何言哉四時行焉百物生焉天何言哉只數語而後世天問天對紛紛之論俱為曲說則知夫子之言性與天道真有不可得而聞者也徐敬弦

令尹子文章

微箕比干忠也而夫子許以三仁伯夷叔齊清也而夫子許以求仁得仁令尹子文忠矣而夫子不許其仁陳文子清矣而夫子亦不許其仁此全在心術隱微上較量徐做弦

寧武子章

或謂成鈍非人之所能逆觀即使武子不能濟君保身其愚亦自不可及不知天下事正不當如此論龍逢比干謂之不可及亦可也李固杜喬謂之不可及則非矣此等處要自有權衡不可少差徐做弦

知處假得愚處假不得故曰可及不可及愚者蒙昧之名當時以武子為愚是使乖弄巧見識昧却武子心事若在武子身上

說則其愚處乃根心之志。明哲所發却是真知。但見理不明。徇時俗之見者。他是個愚耳。其實時之所謂知。凡有聰明者皆可能之。時之所謂愚。非見理之明者不能到也。夫子此言。不惟破時俗知愚之見。亦以闡武子之微也。薛畏齋

孰謂微生高章

柳下惠之和。疑於不介。聖人明其介。夷齊之疾。惡疑於刻。聖人明其不刻。臧文仲以智稱。聖人明其不智。微生高以直名。聖人明其不直。皆微顯闡幽以垂世立教也。徐徵

微生高之直。不特人以為直。而微生高亦自以為直。連微生高亦不自知。被夫子探他隱微處出來。他的直。繞說不去。夫子此言。不但為微生高。蓋以直教人。使知所謂直者。不在外而在內。

也。若理得於心，從真而發，便隱微處亦是直。故曰：直在其中。詩稱文王不識不知，順帝之則，蓋無思慮知識之心，而後能順帝之則。凡道理皆如此，故觀微生之直，而陳仲子之廉之類，皆可推矣。薛畏齋

巧言令色章

假心人做事，瞞不得真心人。左邱明恥之，是真心人替他愧恥。當時惟邱明有此心，與夫子同，則其他之不知恥者亦多矣。薛畏齋

顏淵李路侍章

吾視千載而上，明學問於廟堂之上者，唐虞也。明學問於泉石之間者，洙泗也。其臣主之都，俞師弟之切磋，雖言人殊而大旨大宗未嘗不協於一。故學者讀經，最要就此理會。如子路之

車裘共敝。顏子之無伐善施勞。孔子之老安少懷。淺深分量。自有不同。然却不可苦為較量。只要見得車裘共敝。自甚麼樣的心。勝其學問。是甚麼樣的血脉。無伐善施勞。是甚麼樣的心。勝其學問。是甚麼樣的血脉。老安少懷。志誠大矣。亦有他是甚麼樣的心。勝其學問。是甚麼樣的血脉。蓋吾輩學為聖人者。只是學得聖人之學。不能驟然躡得聖人之等。若不從學旨上討明。而漫從品分上摹擬。是為凌躡凌躡者。決無到手之理。不從明學上講求。而第從分量上考較。便是末上。便是向人分上求。敝舌疲精到底。無學明之理。子路曰。顏子大。孔子他儘力講來講去。只是孔顏分上的事。於己何干。李見羅

老安少懷。友信是聖人。將這個身子。公共放在天地萬物中。一

般者故以一物不得其所為己憂以萬物各得其所為極至在一家則行於一家在一國則行於一國在天下則行於天下各隨其寓而無不有以大其施也徐倣弦

聖人之言只是平常日用之間即今日言之今日就有下手處非若二子之尚須着願字也此所以為聖人之言也然於平常之中而玩之有有天地之量同上

十室之邑章

孔子平生不以賢知先人故曰若聖與仁則吾豈敢至於出則事公卿入則事父兄喪事不敢不勉不為酒困亦曰何有於我哉何其謙之至也獨於好學則平生直以自當亦不多以許人為之不厭誨人不倦則可謂云爾己矣其為人也發憤忘食樂

以忘憂不知老之將至。又曰我非生而知之者。好古敏以求之者也。又曰十室之邑。必有忠信。如某者焉。不如某之好學也。何其任之甚也。愚嘗因此考之。孔子雖云天縱之資。自人視之一切見成。無待於學。由孔子自看。學既入頭。却是把定腳跟步。挨將進去。今觀志學一章。每十年方纔換出一段風光。進一階級。若說孔子十五歲時便能耳順從心。則天下之人固不肯信。若說耳順從心必待六十七。則孔子分明是學成不是生成。孔子實信得這步好學之加。所以實承當這句好學之任。實承當好學之任。不是自誇。正欲天下後世學者實信受奉行好學這句。庶幾涉聖躋賢。世間多有其人。而渠亦不致枉費了一生的苦行。直以其質稟少異。便謂之父母胞胎裏長就了的。不曾

費半分功夫也豈不惜哉李見羅

聖人以忠信為美質而今人以聰敏為美質聖人以敏事慎言為好學而今人以讀書能文為好學噫敏也久矣徐敬弦

雍也可使南面章

夫子於仲弓之問伯子則曰可也簡於仲弓之論簡則曰雍之言然味此兩言真是渾厚和平徐敬弦

居敬行簡是有主宰居簡行簡是無主宰所以不同同上

子桑伯子得簡之意而失簡之理故夫子可也簡言他為人也好其行事亦知所簡矣仲弓認可字作全好字樣言伯子之簡頭原差了乃是大簡如何謂之可仲弓此言雖未喻夫子可字之意他認得學術原頭端正此子桑之所以為異端而不同於

吾道者故夫子然之。然周末文勝。至於滅質。子桑能悟其失。欲反諸簡。是亦質美之人。但反學問耳。若在聖門。亦狂者之流。可裁之而使歸於中道者。仲弓雖認得原頭處正。而不悟此意。亦是他學問未精處。聖人亦不好與他說這話。故曰雍之言然。蓋以成德達才之教待仲弓。而未可語於時雨之化。與薛畏齋仲弓之不與子桑。即孟子之闢告子。皆在孔子範圍中。聖賢分量不同如此。同上。

袁公問弟子章

前輩謂懲忿工夫。當遏之於始。忍之於中。制之於後。又謂於怒時。遽忘其怒。而觀理之是非。雖亦是治怒之法。但恐怒之方發。一時禁制不得。須要平日有涵養克治之功。徐敏強。

問聖人無過。顏子不貳。過此是聖賢之別。若不遷怒。恐聖人亦不過如此。曰。聖人心本無怒。因物而怒。自然不遷。若顏子必用許多工夫。乃能到此。然猶守之也。非化之也。同上

七情皆當克治。而夫子獨言怒者。蓋人之七情。易發而難制者。惟怒為甚。故易象傳以愬愬與窒慾為對。而大學傳亦以愬懷居恐懼好樂憂患之先。良有以也。同上

人之遷怒者。多是血氣用事。貳過者。多是私欲流行。若好學之心一萌。則分數可減七八。同上

遷與怒。是降伏這氣。不下被他使了。不遷不貳。是以理制心之功。義理立得脚定。不為氣所使矣。若聖人則氣即是理。不遷不貳。不足言矣。薛畏齋

回也其心章

後儒論學開口便說心一部論語言心者只有回也其心三月不違仁一句不知學者到此曾着一思量否此中真有無窮的道理合作敲推至妙的機關合當究辨試發一問如何叫做心又如何叫做仁孟子曰仁人心也後來相沿說心即仁也果然心即是仁則說了心不必更說仁說仁又說心叠床架屋違者背而去之謂異體者乃有背同體者不相違三月不違仁幾希二物至者至到之義至國曰至至家曰至日月一至焉彷彿別有歸宿故直截謂為二物何待深詣三尺童子亦未肯信謂為一物則當其背違時仁將何處歸藏心將何處背棄區々此駭大似破碎支離葛藤縈絆果有明眼士直截從茲剖決則此

疑團未必不開悟者試思之試思之姑毋笑其破碎支離葛藤

縈絆李見羅

論語二十章不言心之仁而此章獨言心之仁易三百八十四
爻不言仁而復卦獨言仁若顏子之不違即易之所謂不違復
也諸子之日月至即易之所謂頻復也徐敬弦

簡在帝心天之心也從心所欲不踰矩聖人之心也其心三月
不違仁其餘日月至焉大賢羣哲之心也飽食終日無所用心
衆人之心也同上

伯牛有疾章

顏淵之死則謂之天喪伯牛之死則歸之於命蓋在顏淵則可
以言天在伯牛則可以言命不盡其道而死者皆不可以言命

也徐徽弦

孔門列德行之科者四人。而一以短命死。一以惡疾亡。可見氣數之厄。同上

賢哉回也章

或問孔顏所樂何事。朱子曰。不要去孔顏身上問。只去自家身上討。徐徽弦

人不反求諸身。而欲尋仲尼顏子樂處。所謂爾非魚。何以知魚之樂。同上

聖人樂在疏食飲水之中。故曰亦在。顏子樂在簞瓢陋巷之外。故曰不改。樂在其中。安仁也。不改其樂。不違仁也。同上

夫子稱顏回曰賢哉回也。而又再言賢哉回也。以贊之。其稱禹

曰禹吾無間然矣。而又再言禹吾無間然矣。以贊之。而其所稱者皆不出飲食居處之事故曰禹與顏回同道。同上

在聖人則簞瓢陋巷就是性分中樂地。不知其為簞瓢陋巷矣。故曰樂在其中。顏子只是不為簞瓢陋巷所動。理能制欲者也。故曰不改其樂。薛畏齋

無伐無施。不改其樂。顏子只是少一忘字。若忘得便是聖人。觀老安少懷樂在其中可見。同上

子游為武城章

吾輩士大夫立身行己當以名節自重。海內英豪自有識者交與之間。豈可自輕。乃若在事君子若能鑒別名流。敦尚風節。將大不聲色。士習自正。教化自行。又非簿書錢穀間人所能及此。

夫子之問子游之對意深矣。倘亦今日者賢有司與賢士大夫所宜三復也。昔子游在聖門稱學道君子。初試武城邑宰。武城是魯有周公崇義敦禮之風焉。夫子且不問何以治武城而從容諮訪其邑之才賢長者曰：女在地方必有好友相與。亦曾得其人焉。爾乎？子游拱手對曰：人才難得。武城雖小。將為君子焉。有一個友生澹臺滅明者。胸襟落。風槩稜。其人可親。不可狎。儼敬之重。非所及也。請試言其概。此人也。不是閉關獨處。曾見他行走出來。只是從那大路上坦坦平平行著。其旁蹊小徑。衆人所取捷去處。絕不打從這路上算。便而行。這是一節可敬處。此人也。不是絕物離羣的。曾至偃之室。奉一日之教。但必是邑中有件公禮公舉事關典則動係風尚者。方來下顧。除

此外並不主偃之室。高風在望。不可得而數。見也。這又是一節。可敬處。武城地方良多君子。偃在事之日淺。安能盡交邑之賢大夫士。與游處乎。所知者。此減明一人。所以重減明者。此一二事。夫子問及。敬以斯人對。不審何如。願誠足當子之衡量否。由此論之。這兩句話。頭原只是一句。世豈有置其身於規圓矩方之中。一步不苟者。而肯俯首下氣。常到邑宰之室乎。豈有會疏見少。邑宰廢幾。覩風儀而不可得。而其人肯由表邪別路。自貶生平者乎。故守己峻者。常不以謁候為恭。難親者。必其言可法。其行可則。以此論人。思過半矣。自世風之衰也。人情好說。士薄於名檢。持身不論禮義。只以勢利為媒。遇事不顧廉恥。只以便捷為巧。交際往來。不拘繩墨。只以趨前曲奉為恭。上之人

品格不高。權衡淆混。嘗以委曲捷給者為能。而周行大道之明
結矣。以顧面慣熟者為親。而遠跡高尚之士疎矣。正直者既遠。
面諛者日來。此超走之路。所以百轍千歧。可嘆可厭。不特升邑
宰之堂。且到其室。密地酸醜。顛倒白黑。朝趨暮走。十輩為群。俯
仰酬之。而卒不能當其意。此機械關節。閃爍翕訛之習。所自來
也。末路多岐。言之良亦可歎。讀聖賢書到此一段。要見夫子所
問得人。是何等人。品子游所對所取的。是何等人物。臧明子所
自處者。是何等器局。今日士大夫肯如此行身否。聖賢一問對
間。不過兩三句。令千載思之。士君子之節行。賢有司之好尚。卓
然自立於風塵之外。廉頑起懦。高標冷口。令彼好諛趨炎輩。直
可汗流僵仆。無置顧面處。其於世風士習。良非小補。敬為諸君

子誦說其大義如此沈長水講義

質勝文章

裁成天地之道輔相天地之宜此聖人與造化和合顏色的方
子却是物各付物一毫無所用其加損如是乃可謂文質彬彬
成君子之德矣薛畏齋

齊一變章

齊之難變以壞於霸習則霸圖本欲興衰而適以病國魯之易
變由存乎王道則王道雖微猶足以扶國家於既敝魯周公之
後先王之遺風尚存齊仲孫湫謂魯秉周禮晉韓宣子謂周禮
盡在魯哀公用田賦猶使人問孔子齊安得有此氣象徐敬弦
博施於民章

堯舜其猶病諸。聖人不得以盡仁。天地之大也。人猶有所憾。天
地不能以盡道。徐徹弦

己立立人。己達達人。即目前做亦得。便做到堯舜地位亦得。若
起頭便欲博施濟衆。便一步不可行。同上

述而不作章

夫子贊易自伏羲皇也。訂書自堯舜帝也。刪詩自商湯王也。脩
春秋自魯隱伯也。當時六籍經。夫子一番整理。後雖遭秦炬而
不能為之掩蟻。至今與日月俱懸。朱子所謂其事雖述而其功
則倍於作者。不誣也。徐徹弦

默而識之章

仲弓問仁。夫子告以己所不欲。勿施於人。是即所謂能近取譬。

可以為仁之方矣。備矣。乃必曰：出門如見賓，使民如承祭。本無賓，本無祭，翼々小心，如見如承者，何事？子張問行。夫子告以言忠信，行篤敬，雖蠻貊之邦行矣。義備矣。必曰：立則見其參於前也，在輿則見其倚於衡也，無言無行，忠信篤敬，亦何有？嗟乎！此正所謂然而識之的消息也。止於至善之脉路也。穆穆文王，於緝熙敬止，每以在宮雍雍，在廟肅肅，不顯亦臨，無射亦保者，當之學問。若無這一步，畢竟不入微，畢竟不達本。說本體固有合有離，說功夫亦有斷有續，只一個然而識之。真所謂通乎晝夜之道而知也。教與學果何事？即所謂然而識之的條件也。默識又何事？即所謂教與學的主體也。予於大學中，拈出止脩兩法，正有悟此。此孟子落實做手故屢々以之自當。至此却又揭

以自歎。大率謙已誨人意。未嘗不寓。而就孔子三十四十以前。則亦未諒其立與不惑。自信之為何如也。世間決無有一個不實的聖人。又安得有一句不實的說話。說個何有於我。容或有未。有於我。說個是吾憂也。確實是有憂也。終日不食。終夜不寢。發憤忘食。樂以忘憂。費了多少氣力。而可云泰然無有惕厲兢業。一切熟路。輕車。何有於我。李見羅

子之燕居章

申申天天。已涉形容。然申申而曰如天天。而曰如。又見非言語所可名狀。姑借此以擬議之也。徐敬庭
申申天天。弟子之記夫子者如此。然夫子之在當時。微生則譏其杞。杞東門則譏其皇。皇又若有不豫色。然者。蓋杞杞皇皇。憂

世之志也。申申天天。樂天之誠也。知夫子有申申天天之容。色。又當知夫子有栖栖皇皇之容。色。然後可。同上

甚矣吾衰章

戴少望謂顏淵死。聖人觀之。人事。固不至。圖不出。聖人察之。天意不夢。周公聖人驗之。吾身然後知斯道之果不行。而天之果無意於斯世也。徐敬弦

志於道章

志者。尚非我有。但有志於此。據者。已為我有。若據之然。惟恐有奪而去之者。至於依。則與我相安。若依之而無少頃刻違矣。游字甚好。纔不着意。便是廢業。纔着意。便是苦心。於中有妙趣在。徐敬弦

不憤章

心求通而未得通則其意憤然而不能自己憤者鬱憑之意口欲言而未能言則其貌忤然而不能自伸忤者屈抑之貌啟如啟戶畧開之也發如引弓發其機也舉一隅另是一般人

徐倣

子謂顏淵章

行是行个甚麼藏是藏个甚麼聖賢作用在此抱負亦在此此等處不可不理會

徐倣

或問於余曰顏路二子道德重師門他日侍側夫子嘗令各言所志蓋並稱大賢矣一日乃獨謂顏淵曰有物在此用之則可行舍之不用則又可藏此惟我與爾兩人者有是夫彼時季子在侍分明置之此局外矣行三軍則誰與季子所以自負而願

有請也。夫子直外之曰：暴虎馮河之徒，吾不與也。雖行三軍，亦用不着其所稱臨事而懼、好謀而成。此一輩人者，不知於用行之事有當乎抑與孔顏行藏之義合乎不合乎。余應之曰：君子處世界中，用舍不聽之人，其主持常在我胸中。渾、淪、有、一物者，函蓋六幕，主張萬化，可以用，便有此物在；德施大行乎天下，可以不用，不用亦有此物在。自足涵暢其胸中，用亦有不用，亦有行固有個推行方畧。藏亦有個安頓去處，用根於藏，藏顯於用。此之謂善藏。其用行萬物於把握間，藏天下於針風不漏之地，所謂隱居求志，行義達道，達可行於天下而後行者，此物是也。彼豈汲汲世名沾沾才技盡露鋒鏑與世局爭衡者哉。故蕭々環堵然々無言者，反可以酌四代而準百王行々兼

人乘桴浮海者反不堪濟艱難而樹功伐嗚呼聖賢之涵養見於此矣請言用藏之義天下大矣萬物襍矣利害相攻安危相倚未嘗一日輟靜吾居其間即使乘時遇主上有君王東局當陽何能一一盡如吾所欲行下有百司兆庶人各一心一見安能盡如吾一人所施設故用舍行藏非兩截事即行即藏即藏即行曲有微機大率以善藏為主什九在中什一在外此不盡用之謂藏因天而天因人而人因時而與變化此不行吾意之謂藏庶職自明冀羣材自匡襄國論自揚吐我默握其機聽天下各盡其情而了無妨礙此以人用人以事應事之謂藏大有剝斷不顯其能大有鎮持不顯其功大有掃蕩清滌不顯其畧作事在彼得効在此堤制在後救助在旁精心苦志天下莫

能簡輕：灑：一拂便了。此之謂以不用用之謂藏。凡吾所用者皆吾之明也。凡吾所不用者皆藏吾之神也。既藏其神兼藏其器既藏其名因藏其用。孔子贊易所稱通天下之志定天下之業斷天下之疑聖人以此洗心退藏於密古之聰明睿知神武不殺之謂也。而暴虎馮河圖浮氣何為乎古之君子百鍊純綱擲之無景真金足色火氣全銷凡以藏神太空而大用人羣之術也。此義若透其於治天下如反掌然不費絲毫力即臨事戒懼不為禍首何異乎時幾之兢飾即遇事好謀博集羣策何異乎嘉謀之僉同即事必美成百昌百里何異乎續續用之平成萬益徂征班師舞羽七旬苗格此之謂善藏其用嗚呼三軍之事又豈在用行之外哉故知孔子材季子及與子淵之意精

機無殊在人善領而已。余嘗告肩吾氏曰：神龍之功能大奉以風雷雲物，騰揚九天，為霖四海，亦大播弄矣。然不能不釋風雲而藏九淵之下，故大海得以其浩濶無倪，制神龍之柄。吾輩用天下，是用其所以藏藏其所以用，只此微機可聖可神，乃文乃武。三代下誰能及此？吾請南華至跡，踟躕滿意，善刀藏之，為千古英雄落淚，嗚呼用世之難，自昔歎之矣。沈長水說大指。

子在齊章

不圖句有不可形容之妙在。蓋其平昔所覽於書，觀於周，尚未覺其盡善盡美。至於此極，故不覺其歎息之深如此也。徐儼強蘇氏曰：孔子之於樂，習其音，知其數，得其志，知其人，其於文王也，見其穆然而深思，見其高望而遠志，見其黯然而黑，頌然而

長其於舜也可知是以三月不知肉味

飯疏食章

孔顏之樂有淺深亦未可知但所謂不改其樂樂亦在其中語意亦只是一般若在此上較勘其淺深便是以常人之心度聖賢之心也徐敬弦

經煅煉迺可辨金臨境界迺真見學虛意見只好背地矜誇空話頭只好閑時播弄小小利害當前心悸魂搖手忙脚亂便都假不得了用不着了此便是煅煉士子之真心候也所以聖人論學每諄切於此所謂富而可求也雖執鞭之士吾亦為之如不可求從吾所好又曰飯疏食飲水曲肱而枕之樂亦在其中矣不義而富且貴於我如浮雲富貴貧賤的境界不可託大

看了多少有志之士。到此闕透。不過誰能信得命。及斷以不求。誰能守得義住。浮雲相視。象山曰。富貴利達之不足慕。豈足多。較於學者之前哉。果然學有得。加最大者。莫如死生。亦是閑事。富貴貧賤。又曾足道。苟非其人。大言高視。未論死境。現前些小利害。便渾身放倒了也。懷居者不可為士。富貴淫。貧賤移。威武屈。試問之。還別有大丈夫否。廣居正位。大道云々。者。總虛託矣。
李見羅

戒非生章

心齋王氏曰。孔子雖天生聖人。亦必學詩學禮學易。逐段研磨。方得明徹之至。徐敬弦生而知之者。如本明之鏡。不待刮磨。自然光瑩。學而知者。未便

明徹必待到磨始得開豁。古人典章皆所以印證此心。好古敏求。即所以到磨之功也。同上

天生德章

公伯寮欲害子路。夫子則委之命。桓魋欲害己。夫子則信之天。委之命者。不能必其不害。信之天者。決知其不能害。此可以見聖賢之別。徐敬駟

蓋有不知章

愚答詹純甫書有曰。聖人之學。只愁不止。後世之學。只愁不知。因舉吾有知乎哉。無知也。斷之曰。直直認個不知。隨感而應。自無不知。舉蓋有不知而作之者。我無是也。斷之曰。正是只愁不止。不愁不知。嗟乎。此義之不明也久矣。驟而語之人。誰肯信。先

輩每謂孔子無不知而作。顏子有不善未嘗不知。百姓日用而不知。只爭一個知字。是矣。是矣。曾不思孔子何緣便無不知。百姓又何緣日用之而不能知。大率返本一步。則日靈日聖。離本一步。則日蔽日愚。靈從何來。從本而出。蔽從何來。緣感而增。孔子無不知而作。常止也。言在幾之先也。顏子有不善未嘗不知。知止也。故不遠而能復也。百姓日用而不知。則放其心於膠轕紛擾中。日馳騖而不知反也。今不本其知與不知之由。而惟較其知與不知之等。徒手望洋。終無必濟。學者亦誰不知。孔顏庸子。知不知之曠然有分別乎。若只在知上討求。就知上角競。則多聞而擇。多見而識。亦何嘗不是本知。何嘗不是用知。而聖人乃以為知之次乎。人只有一個心。決無兩心。故亦只有一個知。

決無兩知。知其只有一知。則孔子之所以無不知。顏子之所以未嘗不知。其立命歸宗。不專在知上求討也。決矣。多聞而擇。多見而識。亦自有此等學問。亦足幫添得知。然以語於盡性至命之機括。則茫然未有入也。故聖人斷以為知之次。正以其病在知上著功。而不本其知之所自來也。豈以為人真有两知。而此乃其知之次者乎。今若必以知為宗。就求知。求知著致。知無停機。致無停用。轉致轉訛。轉知轉遠矣。雖自謂異於多見多聞。而不知其杪忽毫分之差別。亦將安所托始乎。聞而能擇。見而能識。亦非全然泛濫馳騁之比。特以其知有知。不知有本。知有致。不知有止。立命歸宗之底奧。與聖人無不知之宗趣。默分款項耳。此最學之毫釐所宜深辨。予於他書亦屢發之。而此尤

聖人自揭大公案。曆一申之志於明宗者。庶藉之一考矣。李見羅

互鄉章

王厚齋曰。闕黨之童。遊聖門者也。夫子抑其躁。是以知心之易。放互鄉之童。難與言者也。夫子與其進。是以知習之可移。徐敏

文莫吾猶人章

文曰。猶人。於尚可及人。見不難能之意。於不能過人。見不必工之意。合而觀之。又見不遜其能之中。而實寓謙之。意。躬行曰。未之有得。見行之維艱。意見其以必得為効。意合而觀之。又見其汲汲於此。而不敢有一毫自足之意。一言而曲折詳盡。有如此。徐敏

愚自幼讀論語。到今積有歲年。始見得聖人之道。渾是一團和

氣發出聖人一身。渾是太和元氣周流。學庸孟子便無此氣象。論語中一言一行皆可以窺聖人冲和之蘊。即玩此上幾章亦自見得楊子法文中子中說要學論語。彼未嘗有一段冲和氣象在胸中。如何學得論語法言便說得急。中說只學得影響而已。同上。

子疾病章

某之禱久矣。此五字雖含蓄許多自任意思。然其意渾厚不露。所以為聖人之言。真加減一字不得。註中意只可於言外說出。
徐徹強

泰伯其可謂至德章

黃直卿曰。泰伯不奔父喪。非本心也。奔則王季辭立矣。逃而適。

他國足矣。必之荆蠻。斷髮文身而後已。蓋不示以不可立。則其
心不安。其位未定。終無以仁天下。繼父志而成其遠者大者。朱
子曰。此意甚好。非惟說得泰伯之心。亦說得王季之心也。蘇子
云。漢東海王以天下授顯宗。唐宋王成器以天下授玄宗。皆兄
弟終身無間言。何必斷髮文身。若使王季之心。如漢顯宗。唐玄
宗。則此說可也。若有叔齊之心。則不能一朝居矣。王季之心。豈
下於叔齊哉。然泰伯三讓而不失其正。是乃所以為時中也。故
夫子以至德稱之。愚按。今之稱泰伯三讓者。俱以為讓天下於
商。由本文有天下兩字故也。畢竟此說不為通論。何以言之。太
王實始翦商。此魯人之誇詞。非當時之實錄也。計太王之時。適
當武丁朝。諸侯有天下之日。當時南方全盛。周雖強。大一侯國。

耳豈敢遂有睥睨王室之意哉。泰伯雖智亦安能遂知百年之後天下之必為周哉。泰伯之讓讓王季也。尊父命也。重天倫也。今舍家庭父子之近而憂及商周君臣之事不以目前可讓之位為言而乃獵取百年以後他人之天下以為讓噫亦過矣。曰然則夫子所謂天下者何近。歸氏所謂國與天下常言之通稱也。其論之尤詳茲舉其要云。雖與朱傳不合學者亦不可不知。
徐倬

泰伯與文王之德皆足以有天下而不有故均謂之至德。但文王顯其迹於臣道克盡之時人猶得而知之。泰伯氏其迹於子道克盡之日人不得而知也。故夫子表而出之。
薛畏齋

恭而無禮章

恭也。慎也。柔德也。有禮則為柔。善為柔中。反是則柔惡矣。勇也。直也。剛德也。有禮則為剛。善為剛中。反是則剛惡矣。徐敬強

啟予足章

人之一身。可以為父子。可以為君臣。可以為夫婦長幼朋友。身可以脩百行。心可以通三才。至尊至貴者也。父母生你出來。把這一個至尊至貴的身體。交與你。豈是教你飲酒食肉。豈是教你縱色淫聲。是要你盡這個道理。勾當造化底許多事。你了許多事。臨死將這個身體。還造化。還他方。謂之不愧於天地。不愧於父母。若一有不盡。滅絕其真。慎不可以為人。不可以為子。便是把他身體都毀傷了。何以復命於天地父母哉。曾子平日戰戰兢兢。臨深履薄。只是為這一個念頭。臨死方才了當。不是但

為手足之無傷而言也。人若有曾子之心，便是龍逢比干之身，首分裂與曾子之啟手啟足一般。不然，便老死牖下，亦與盜賊之刀鋸僇辱無異。故觀此章者，可以醒然。薛畏齋

手足不是為持行要他周旋禮義。人若能周旋中禮，便更完全。手足舉一體而百體可推，此曾子啟手足之意。同上

以能問於不能章

人若血氣未盡，則有能有不能，有多有寡，有有實有人有我。若天理中皆無之，顏子克己功至，胸中更無一物為礙，不見己之能，亦不見己之多。故天理流行，取善之心，無有厭足。己不有其有，人亦不得而見其有其有也。若無而已，己不足其實，人亦不得而知其實其實也。若虛而已，人若去犯他，他血氣已盡，是

非之心無緣而起都消融於和氣中更無計較之心都是天理用事故云幾於無我但守而未化耶 薛畏齋

士不可以不弘毅章

人之身都是血氣做來有血氣則有我。有我則有欲。有耳目口鼻之我。則有聲色臭味之欲。有我者。血氣為主。志易滿。氣易盈。些須事業便塞滿了。如何任得重。有欲者。染累多。物物得而屈之。如何做得到頭。曾子平日有得氣質上病痛。莫大於不毅不弘。士之所以不能任重道遠者。都是這病痛為之累。故言求道之人。須是弘毅。蓋弘毅不是離了氣質去做。只是克治了氣質。使義理為主。則有我而無我。自然能弘。有欲而無欲。自然能毅。如聖人何嘗不任耳目口鼻。但天理用事。耳目口鼻更作主不

得所以堯舜有天下不與許大功業在性分中無一毫這便是仁以為己任處何重如之亦何嘗不與聲色臭味相接只是累他不得如堯舜兢兢業業一日二日萬幾直到死方休生存更無懈怠之時這便是死而後已處何遠如之弘毅二字是曾子平日得力處故舉以示人薛畏齋

仁為己任是理之不遺死而後已_{是理之不息}蓋天之所以與我者本如是其大且久只借我身心盛載他弘與毅是身心與此理一般久大孟子配道義之說本諸此同上

興於詩章

夫子見詩禮樂足以為學之資故如此說非謂人之興立成專靠詩禮樂也吾心自有無言之詩無體之禮無聲之樂特假外

之詩禮樂以贊助之耳。若不知求諸心而專務於外則詩亦章句訓詁而已。禮亦名物度數而已。樂亦鐘鼓管籥而已。於心何得哉。徐儼弦

聖人此言見得詩禮樂之教先王不是強人是吾心原有的何以明之如好善惡惡吾心原有詩也肌膚有會筋骸有束吾身原有禮也惡可已則不知手之舞足之蹈是吾心原有樂也故誦詩習禮學樂雖始學之事然自學者進德以至於成不越乎此如誦詩而好惡之真機忽動此興於詩也誦詩到興處則詩不在三百篇而在吾之心矣故口耳非詩也興處乃詩也古人教之誦詩欲其興而已豈口耳之謂乎學禮而至於德性堅定外物不奪卓然有立處是立於禮也學禮到立處則禮不在三

千三百而在吾之心矣。故儀文非禮也。立處乃禮也。古人教人學禮。欲其立而已矣。豈儀文之謂乎。若功夫純熟。血氣消融。其於聲容舞蹈之間。蓋有聲為律。而身為度。動容周旋。而不自知者。是成於樂也。學樂到成處。則樂不在聲律。而吾之身心皆樂矣。故聲容非樂也。成處乃樂也。古人教人學樂。欲其成而已。豈聲容之謂乎。薛畏齋

好勇疾貧章

好勇疾貧。則義心已絕。疾惡過甚。則仁心已絕。義心絕。則自家奈何。那血氣不下。仁心絕。則人無生路矣。皆自我致亂。故曰生亂則一。薛畏齋

如有周公章

驕者謂天下之莫己若也。吝者恐天下之與吾能也。驕者矜己之有餘。吝者幸人之不足。此等人渾是一身病痛。雖有才美亦餘事耳。故曰其餘不足觀也已。徐倣

集事之謂才。才只是幹得事去。但周公之心天理為主。他幹事都是天理當然。與己無與。故才美不見驕吝。何從而生。人若有周公之才美也。幹得事去。只是平日無事心之功。私意為主。人我未忘。恰似我能。而人不能。一般未免有挾己所有。驕人所無的意思。驕吝一生。實心俱喪。做的事業都無意味。知管仲九合一匡。沒個器識。去色裏他身未沒。而叛者已九國。周公之功至於今誦之不衰。蓋有溢出於知能才美之外者。此足觀與不足觀之驗也。薛畏齋

篤信好學章

篤信守死是氣質好好學善通須從學問來薛畏齋

狂而不直章

吾不知者不知所以教也蓋學者心地上不受病氣質上病痛儘不妨聖門學者氣質儘多般他心地只一樣故五尺童子羞稱五伯寧可做不到五伯事功並沒有這般樣心地王伯之分原於此薛畏齋

巍巍章

人皆以有天下為巍巍夫子獨以有天下而不與為巍巍稱舜禹者非獨以其為匹夫亦以其得於揖讓一旦偃然而有之也徐徹弦

堯舜以天下與人無有也舜禹受人之天下而不與也此等氣
象學者觀之而有得亦足以消鄙吝之心同上

高大對卑小而言心局於物則卑小超於物則高大有天下不
與便是魏巍之實不與者因物付物都是天理自然如此於吾
性分上都無加損舜禹不獨有天下不與便是耕稼陶漁亦不
與獨言有天下者舉人情所重而言耳薛畏齋

大哉堯之為君章

蔡氏曰天之大是盛德大業堯之同天亦是盛德大業蕩蕩難
名德之盛也魏乎煥乎業之大也須平說若謂德不可名所可
見者惟功業文章而已則其詞氣為有抑揚不應曰蕩蕩乎魏
魏乎煥乎一氣說下德亦不是玄妙成功文章亦不是粗迹此

說好但與傳註不合

徐敬強

夫子以大哉稱堯而以君哉稱舜以大哉贊桀而以至哉贊坤
可見舜終在堯範圍之內

同上

舜有臣五人章

朱子曰文王之事紂惟知以臣事君而不計其他所以為至德
若謂三分天下紂尚有其一而未忍輕去臣位或以高之先王
德澤未忘歷數未終紂惡未甚而不敢以遽取則是文王之事
紂非其本心有不得已者耶豈可以言至德哉

徐敬強

禹吾無間然章

夫子稱堯曰大哉舜曰君哉而於禹曰無間然似有深意然下
此而為湯之有慝德武之未盡善則是未免於有間然矣

徐敬強

大哉孔子章

聖者大而化之既謂之聖則有不離於博學多能而亦不圓於博學多能者在黨人以博學為大太宰以多能為聖泥於其迹既不曉得不圓於博學多能的意思子貢云又多能也將聖與多能分作二事又不曉得不離於博學多能的意思故孔子曰吾何執言藝無窮將何所執乎此教門人不可以博學求大也又曰不多也言君子無所不知而一無所知無所不能而一無所能其所以為君子者不在於多知多能而在於無知無能處又何貴於多哉此教子貢當於多能處求其不多不可析而二之也要之博學而無所成者正是孔子聖處惜黨人不足以知此

薛畏齋

太宰章

以多能為聖。此衆人之見。以聖為兼多能。此賢人之見。雖有本末輕重之分。尚不免於粘滯。以聖為不在多能。此聖人之見。則洒然矣。徐敞

有美玉於斯章

子貢之言。病在於求。夫子之言。妙在於待。沽之沽之。既不以無心棄天下。我待買者也。亦不以有心徇天下。詞氣甚和緩。徐敞

子在川上章

人生天壤間。患不聞大道。所云大道者。何是。天地古今常然如此之理。聖賢去人。只在這些子透與不透上。便謂之大覺大迷。全在此處分頭路。我嘗遍看世間人。其知名當世者。亦是千

百輩中好漢。却都將此世界。認做是我常住再不去的世界。居
官便認官職。是安穩。常快活。不改換之物。居家便認家業。是安
穩。常自在。不棄捨之物。多將此心。與一世界人。俯仰抑揚。爭攘
報復。色攬佔。護牽縛。了一世。由明眼人。視之色。過影一彈指
間。便去了許多。正如木偶登場。暫時呼笑。被造物者。將那線索
提去。放倒在壁柱頭上。嗟。此園木中間。尺五地方。豈是汝住
頭之地乎。一出打。彈過後。面一出。又出來了。思之亦大可笑矣。
所以吾師尼老。一日在川上。感川流之逝。機洞千古之大。歎喟
然。稱曰。如是如是。面前的人。不見麼。原來此物。只是去的。不是
住的。只是一去不回的。不是再有回轉的。又
溜。溜。忙。忙。如鳥飛。鼓轉。只管去。而不停的。不是一刻少住的。
夜溜

自古到今。你何曾見東馳之波。再返源頭。過去世界重新如昨。也。嗚呼。千古萬古。被此一聲喝破。再無還復。人心中千念萬念。閃爍變幻。一片佔間佔舍。千年不了的癡漢心腸。被此老一聲提換。不由你不當下灰寒了也。蓋嘗浩蕩思之日。沉月升。是一日過去。光陰如駛。春往秋來。是一年過去。寒暑代變。朱顏皓首。是一生過去。韶華不住。龍爭虎噬。是千古過去。英雄沉埋。假如軒黃以前。渾噩世界過矣。接了唐虞。又是一片揖讓熙和時候。則渾噩之風。再不得回來也。商周以來。嚴正世界過矣。接了春秋戰國。又是一片勢襍爭雄時候。則商周之治。再不得回來也。漢唐宋下。丰明丰晦。丰否丰泰。繞小可些。少間又壞了。何曾一日駐車停馬。有百年太平清明之日乎。江河風濤。頃刻百換。前

浪後浪。激蕩難平。隙中之駒。半瞬不輟。歇郵亭之客。過去便無情。故曰川閱水以成川。世閱人而為世。此理常。如此故謂之道不得已而名之曰神。曰化。曰元氣。曰太虛。曰太極。二五皆假借名之耳。佛家言現在世界新新不住。道家言大曰逝。逝曰遠。與吾師逝者如斯之說。豈異指哉。皆歷世練熟。越局高設。了達世間之妙論。故識者尊而高之。曰此論道之言。後儒乃轉韻之。曰天地之化。無一息停。君子當自強不息。純一不已。其要只在謹獨。此其論學示人言。亦切矣。我以為天自旋。日自行。水自流。鷺自飛。魚自躍。柳自發。花自鮮。宇宙中間。此理自然而然。一絲不勞人心。吾人若必晝夜効。效其不息。毋乃太勤而遠於自然之道乎。若論道之本然。千古世界。自動自靜。亦無動亦

無靜。只任自過自去。皆不可控揣拘執之物。即天地日月亦在中推移。不能強為之主。聖賢豪傑亦在中維持。不能盡了其心。吾輩教中人亦在中窺覷。測得一二分。終不能於川上一歎之上。再加點綴也。然則吾人處世宜如何。世界萬變而不定。光陰一老而不留。風波常動而不息。晝夜常運而不間。吾既朗然大達。豁然盡了。則無心以應。隨時處中。當用世時。用可行也。行可逝也。當渾世時。渾可忘也。忘可逝也。住一日。完一日之綱。常住一年。了一年之性命。可久速亦可仕止。無意必亦無固我。無可無不可。此真吾師心印也。彼汶汶以生。茫茫以沒。吾無論矣。其間挺然名世。燁燁如明星之相望。涵為道德。樹為風節。垂為文章。布為事業。炳々朗々。自彼其時。譬之川焉。濡為潤澤。激為波。

灑升天為雲物住地為霖雨皆川流之作用皆有功於天地民
物若循其本而論請問誰為常住者故曰逝者如斯不舍晝夜
言此六虛世界并世界內區事與我一生身世心勝總只是這
般明來暗去便了也此之謂窮理盡性至命之說若我真靈一
物本無來亦無去自有大常大定者不曾散亦不曾留獨立千
古舉世人與我共此物不得蘇長公所謂逝者如斯而未嘗往
也學者自得之沈長水說大義

語之而不惰章

夫子之言諸弟子得之於口耳顏子得之於心口耳之學與身
無干故情得之於心者自動於身有所不能己矣何情之有此
亦足以發欲罷不能之意薛畏齋

唐棣之華章

夫子只借詩詞一反言之而於中涵有無限意思此上着一字不得學者宜自玩味徐儼弦讀詩必如夫子然後為善讀然後為有得三復之真是意味深長令人感發興起同上

孔子於鄉黨章

恂恂如也二句一連說總狀其容貌詞氣然在鄉黨似一個不能言者而在宗廟朝廷又却便便言味此二條即得夫子冲和氣象門人亦可謂善於形容徐儼弦

執圭章

門人狀夫子之容貌每着一如字見夫子之動容周旋中禮有

不能擬諸形容之妙徐偃強
門之入之如不容圭之輕執之如不勝氣之屏又曰似不息
足之蹈又曰如有循門人之善於形容如此同上

色斯舉矣章

昔之記魯論者既述尼師之至言妙道矣其第十章中記衣服
顏色動容履處之詳正如繪化工者及其羽毛鱗甲根莖花葉色
色傳神細描寫令人若登闕里升孔堂如炙如臨有亦步
亦趨之想至其末簡又申之曰色斯舉矣翔而後集山梁雌
雉時哉時哉之語令人恍惚含想起江湖風波世路崎嶇之慨
即我尼師之言曰用則行舍則藏我於世界中無可無不可鳴
呼此孟軻氏所稱聖之時者乎夫出處行藏亦人之巢林藪宅

也舉世茫。繪綴及之哲人邈矣。冥。高飛請繹時哉一篇之
文。夫曰色斯舉矣。色在人意。想有無間殺機。藏之胸中。是鳥也。
何以知之。舉者超然高覽。出塵垢而入烟霄。虞人無所施其巧。
是鳥也。頃刻萬里。豈可籠哉。夫見色知人心。知之速。忙去。少停。
留。仍待。將恐禍機卒發。若不及備。嗟乎。士君子見幾斯作。不俟。
終日。理當如此。夫曰翔而後集。既已高舉。飄。遠去矣。然豈能。
終住太空之宇。離却人間世也。故飛去乍迴。左盼右顧。得一片。
茂林高岡。蒼蔚深藏之處。乃始托翼焉。翔之云者。翱翔容與。不。
失吾常集之云者。安定無虞。棲神甚穩。若審之未詳。擇之不安。
終不敢輕易下來。以干人世之網。故翔舞之久。乃始集焉。嗟乎。
士君子明哲保身。待時藏器。理當如此。山梁之雉。乃借此一事。

發上文之義。山是高。鬼地。梁是行路。傍。雖是文明。物。雖是善。伏
者。身在高。鬼。不忘世。患。有時而舉。有時而翔。有時而集。故稱時
哉。時哉。夫子感小物得時。再三吟頌。以為有當乎用行舍藏。心
事三嗅。而作。豈忘德。釋夫亦雅。見仲子之顏色。故去也。着此子
路共之一句。正與暴虎馮河義。暗相映發。所謂海鷗忘機。見色
羣飛。人之精神。藏在五臟。機事。機心。默應禽鳥。故山間之鹿。可
以隨虞舜。山梁之雉。不免避尼師。則以仲子學力。淺露。不能如
燧人。赫連之世。可係羈。以游。攀緣而闕也。乃悟鄉黨一章。模形
肖貌。着此作結。大與莊周庖牛夢蝶。機鋒相類。人世之難。悄然
增感甚矣。孔門諸子之善傳神也。嘗試論之。人生不能離羣。責
入羣而不亂。不特入羣。又能出拔高翔。不獨高翔。更能應時合

竅其用人羣也。天下樂推之不厭，其超世網也。天下仰重而不疑，其偕一世與之俱忘。天下默入範圍而不覺，故曰孔子聖之時。巧妙只在任止久速間。嗚呼！蓋可忍乎哉？吾想人於生事，不過如化禽飲啄耳。澗沚之毛，清冷之水，普天之下，何處無之？所藉無多。釣餌烏能及我？終日飛舞，不離林樾。逍遙區宇，脚以散百齡懷抱。舊卽舊水，童時所游，沒則斂手足藏焉。瓊闕瑤臺，簪金拖玉，所適不過一息耳。此豈我終身定局耶？潁水箕山，潛光不耀，時乎時，達人高飛耳。吾嘗歷選翔羽，中有三靈物。昔者唐虞道洽，劓韶九成，鳳兮鳳兮，乃始翔舞。其廷一見足耳，何必如後時者？集在祈年，別殿數日乃去乎？夫數日乃去，何鳳德之衰也。漢帝狩思高，山惠肅青宮既定，羽翼何在？帝乃作歌曰：鳴

鵲高飛橫絕四海使鴻鵠可羈耶何殊凡鳥又奚冥冥之慕焉
仙禽員吭鳴則九天自明遠一賦後子瞻續而廣之要以抱明
心於寥廓寄輪羽以西飛千秋一化乃來華表人世紛紛可久
居耶書稱鳳儀詩著九臯易表漸達之羽自是以下鵲鷺之羣
無足污吾類者矣然則尼師抹世之指何如曰吾師之心之道
與世奉自是闕心特甚乃世亦何奉於吾師之有不合於
魯不脫冕焉不諧於衛不再宿焉削迹在宋晏行韜寶焉式微
悲聲接浙負釜焉俯仰人途荆榛冒足何顏何面干彼彌倉既
與主之難期復灶煬之可畏所以達人見色早藏知時遠避策
白駒以長往歌紫芝而不來誠抱精守玄灌園終身而不悔也
軻以論尼師曰可以仕則仕可以止則止以為可仕乃仕否則

宜止耳不可則止是止之時常多於仕矣可以久則久可以速則速以為可久乃久否則宜速耳三年不淹速之時常多於久矣無可無不可時哉時哉以言避世之深遠害之果千古藏神之竅也夫以尼師之聖之才在魯三月後終其身無一過然則攘臂搖目為人流涕太息者何諧世之太勤乎鳥不厭高飛吾望雲而慙高鳥以斯之解捐拱聖門右袒仲子前席子淵宜無多讓焉

沈長水說義

顏淵死章

夫子上接文王之傳則曰天將喪斯文下失顏淵之傳則曰天喪予以斯文興喪歸之於天而以回之死生為己之存亡噫其待回也至矣

徐敬強

由之瑟章

聖門自有許多階級。有不得其門而入者。有得其門而入者。有升堂者。有入室者。有在門牆則麾之者。徐徹

季氏富於周公章

冉求聚斂。不是有心為惡。只是被才使了。不知不覺做去。然學問之道。要反觀內省。照管本根。若徇才而往。何所不至。便是謀利計功之私。亦只是這一條路。所謂毫釐之差。千里之謬者也。聖門之徒。正其義。不謀其利。明其道。不計其功。若一失足。便了不得。故鳴鼓而攻。欲急救之。在冉求。不覺在聖人看來。罪惡極大。譬如拯溺救焚。勢不容緩。故言之嚴切如此。薛畏齋

冉求無謀利計功的心。他做的却是謀利計功的事。以其有是

事故曰非吾徒以其無心是故鳴鼓而攻猶可救藥也 同上

柴也愚章

愚魯者精神內守者也辟嘖者精神外馳者也務內者外不足而內有餘進道之資也務外者外雖可觀根本荒矣如何入得道此正學術內外之辨 薛畏齋

顏淵後章

昔夫子獨薦顏淵為好學後儒因為邦之問又許以為有王佐之才陋巷簞瓢毫髮未徵世用四代禮樂非因設施何取而稱王佐獨家語所記孔語有曰自吾得顏回而門人益親其所作用畧可彷彿猶為未盡及讀論語至子畏於匡顏淵後子曰吾以女為死矣聖人此言亦有若喜若驚之意蓋倉皇避難彼此

相失存亡兩不相知一旦相見不覺其驚喜之交集故如此也
試看顏子如何對答神閑氣定不疾不徐執誼甚高致詞甚壯
曰子在回何敢死顏子此言蓋非見夫子而後知其必在故不
待見夫子而後不屑為徒死也他章夫子之自言也曰天之將
喪斯文也後死者不得與於斯文也天之未喪斯文也匡人其
如予何是夫子蓋有以信己之必生而不能必顏子之不死顏
子則有以諒斯文之未喪而決孔子之必生胡氏所云捐生赴
難請討復讎自是師弟綱常豈知夫天既無遽喪斯文之理孔
子又烏有遽離凶難之事於此信得命及乃為知天於此透得
關來乃為達本不容何病不容然後見君子此顏子之所以畢
竟真知孔子也捐生請討之論去此識見胸襟何啻天壤古稱

大舜烈風雷雨弗迷。正是此等景象。此所以垂裳恭己不動聲色而措天下於泰山之安也。佐王之學際時行道直致唐虞躋民仁壽。若顏子真優為之矣。李見羅

季子然問章

愚嘗看孔子最渾厚。却最激烈。其言語最和平。却最峻厲。如答王孫賈媚竈之問曰。獲罪於天無所禱也。答季子然由求之問曰。弑父與君亦不從也。皆凜然斧鉞冰霜剗根折節震動肝膽。其判道理處。若自古皆有死。民無信不立。亦截然斷蛟刺兇刃不濡血。後來每誦伊川餓死事極小失節事極大之句。以謂有裨風化。不知其骨胎蓋脫自夫子也。夫子到義所當斷處。其峻切亦豈減於伊川。此所以可止則止。可速則速。至於接淅不脫

寬灑然滿然無毫髮滯也。江漢秋陽愚每謂要於此等處。看此處斷不清。別無有秋陽江漢。李見羅。

子路使子羔章

人若少年做事。他聰明觀貼得起。血氣助襲得來。事儘做得。若不曾收斂。見得理分明。聰明血氣有時而衰。到四五十。便使不去反壞了。夫子所謂賊夫人之子也。若收斂聰明。以擴充其身心。不馳驚於事物。使聰明愈斂。而理義愈明。到得積久。則血氣都化而為義理。四五十時。純是義理用事。乃為明體適用之學。格天事業。從此而出。古人定制。使人四十而仕。五十而服官政。欲乘其理明義精。氣質變化之時。而用之。意正如此。夫子之惜子羔。豈是為欲他讀書也。子路若肯沉潛內思。悟得夫子

之意長多少見識却只取辦口頭言語教人更不好與他說這
樣話此便是佞之為害薛畏齋

子路曾皙章

三子皆欲得國而治之是恃其智能才美有取必之心曾點遇
眼前景做眼前事說眼前話都不見他智能才美無取必之心
心無取必智能才美不用則事功所發莫非天理之當然以理
應用而不以己與之推之堯舜事業不過如此三子事業是世
上少不得的他所少者只這些意思而已夫子與點所以教三
子也然曾點亦只是氣質好聰明見得到不是從學問中實得
的何以知之觀其言曰夫三子者之言何如夫三子之言便是
曾點之言各言所志而已有何高下夫子所以哂由者蓋為世

間的事。凡所當為者。皆是天理合當如此。與吾性分中都無所與。而吾之應之。亦只是感通順應之常。智能才美都無所用。有何功勞。有何所與。三子却說由也為之求也為之非曰能之。恰似從他智能才美中做出來。都無個順應感通遜順的意思。不如曾點無所容心。思不出位。却見得這些大意。夫子所以哂由也。哂由者。所以哂三子也。曾點若是實見得這道理。理會得夫子的言語。則三言已盡。何須更問。却又問求亦不是為邦。蓋疑夫子之哂由。哂其為邦也。子不知為邦之事。便是浴沂咏歸之事。都是世間少不得的。除却為邦亦無志可言。無事可做矣。更說甚浴沂咏歸。以此見得這些道理。曾點不曾實有諸已。只是聰明見得到。還須從事學問之功。在事上理會。故夫子實其為邦。

以明有此志即有此事內外本合一為邦不是可哂的有了曾點之志要在三子事功上見有其志而無其事則事理不合一曾點之志亦無用處乃所以教曾點也 薛畏齋

夫子何以之問問其把平居何等學術去應人之知非必問其人知之後何等設施也三子之志都說人知以後設施的事曾點之志則舉平居眼前的學術來說而所以應人之知者即在此曾點只是素位而行隨其所遇無不可樂三子則願乎位之外三子必要人知方行得曾點不論人知人不知隨時隨處皆可行三子格局拘曾點機括活三子取必於人曾點取必於己三子等待他日做曾點只在今日行三子揀擇地方做曾點即在此地行此夫子所以獨與點 徐儼強

曾點之言志便是素位而行不願乎其外如暮春只目前時候
不待三年春服既成亦不待玄端章甫冠者五六月童子六七
人皆同儕皆魯產不必其可事之君可使之民於沂而浴於舞
雩而風沂與舞雩皆魯境也浴之而風適吾情也又非有若邦
國宗廟之不可以為國相君之不可期道理取之左右事功付
之倘來無所假借無所等待殆即夫子老安少懷之志也欣同上
昔者夫子之高第弟子由求點亦嘗在沂泗之壇奉子之色笑
於時子見英賢滿座默有世思焉欣然語之曰我固有一日之
長然談道述志不讓於師今日却須有懷必吐譬則家、懷崑
田之壁人、握靈蛇之珠今者試各吐珠發壁以相示爾我知
交盡傾懷抱斯乃天下至暢快事即莫我知乎吾徒足以樂此

吾無憾焉爾已此夫子一片真情穠意淡々融々亦何所着意
其間者哉及子路以可使有勇知方對夫子畧哂之求見其如
此避席曰願得小國試焉可使足民未又見求如此避席曰願
為小相奔走而習禮容焉子於兩賢都無許可及點舍瑟雍容
稱言損讓所志者乃與三々兩々同沐春老浴沂風雪詠歸浩
蕩全非子所屬問夫子另作一道空曠無倪文字不覺喟然嘆
曰吾其與點乎此道此心千古未契點即稱了達乎猶然言下
生疑耶有與有不與有哂有不哂用者反見哂不見用者反見
與於是點亦疑之矣問三子者何如疑其何以不與也問何哂
由疑其以為邦哂也問求未獨非邦疑二子者亦以為邦不與
也夫既疑三子者皆以為邦不見與然則夫子獨與點者將以

不為邦乎。大非子之指矣。子第隨問隨答。淡々融々。終不置可
否。軒輊乎其間。則夫子之志溫厚可思也。余讀書至此。掩卷自
怡。而試言之。曰夫子之道。惟顏氏獨契之。子曰用之則行。舍之
則藏。惟我與爾有是夫。所云有是者。何物。出以示人。袖之懷寶。
我有此寶。我自樂之。日用尋常。何之非是。豈必舍素位而旁睨
乎。不必行。亦不必不行。用之則行。不必藏。亦不必不藏。舍之則
藏。我既有此寶。用不加舍。不損吾輩寡數。友高談堯舜等富
勢乎。浮雲吾獨能為此耳。用舍大率由人。故自別於夷齊之儔。
曰我則異是。無可無不可。非漫無指歸也。以在我者自有自足。
無所不可也。孟氏知其心。曰孔子可仕則仕。可止則止。可久則
久。可速則速。若曰仕則仕。即久則久。即倚時之無常乎。即止即

速飲而懷之吾何心之與有嗚呼此點之言現在即真意必俱
忘正合聖人當日行境固沂泗杏壇前一幅玄圖也吾不與點
當誰與乎後之說者又因點之再問疑復生疑解中覓解以為
三子之趣不如點之高又以為點之虛不如三子之實又以為
先與點以廓三子以抑點而高朗再與三子以抑點而進之手
實用如是者胸中分別太多既失聖人無意無必之心契而學
道之家玄峻其說以為點之志可以同流天地一體萬物肩齊
堯舜指顧唐虞斯不乃求之太高言之小過乎吾以為夫子之
適用行舍藏之道也夫子之心無可無不可之心也顏氏得其
微點也能言其鮮三子鮮與不解未可知然皆有裨當世之用
用之皆可行特以不知不行耳謂其必逐功名間者又非也

或曰子之說誠辯矣。安知果夫子指乎曰。夫子固云我特哂由之言耳。他日曰。可使治其賦也。於求於赤。孰非十乘之才。而又何哂乎。然則始問何以者。此物是也。藏可行也。後稱與點者。此物是也。行可藏也。由亦與求赤亦與。都無不可用者。此物是也。四子與夫子始終共行藏者也。無軒輊也。一則曰。何傷乎。亦各言其志也。再則曰。三子者。亦各言其志也已矣。設使其時顏氏在外。夫子曰。自言豈別作一解乎。亦各言其志也已。乃若世方清恬。羣才秉軸。禮樂輝燦。兵食給足。而令我一輩不用之人。曳裾春風之中。嘯歌綠水之濱。倘亦若曾氏之游泳。程氏之吟弄乎。不知賢豪間涉論。以為我輩視堯舜氣象何如也。

沈長水

顏淵問仁章

人只是有這形骸軀殼便為那形骸軀殼不特好貨好色好名
好利百凡動作要占便宜亦只是為我人雖曉得私己是不好
事及事到面前不知不覺又看得自己身上重了所以己最難
克門人之記夫子曰毋我亦只是此意徐敬強
克字勿字皆是着實用力字而克字如斬截不容復續勿字如
隄防不容復潰均非至健不能同上

仲弓問仁章

克己復禮者理為主如天之包地萬物變化於其中矣故曰乾
道主敬行恕者順理而行如地之承天物各有財不敢踰越故
曰坤道薛畏齋

子張問崇德章

徙如人之徙舍安土重遷人之常情畏難苟安人之通患故夫子以聞義不能徙為憂而以徙義為崇德徐倣弦

季康子問政章

康子纔說個殺字孔子便說個善字來換他康子欲殺惡人以致就善人孔子便欲化惡人以為善人康子之意專任刑孔子之意專任德徐倣弦

衛君待子章

子路問為政奚先夫子以正名答之當時使夫子而執衛國之政其所以正名者必自有說後世若胡文定之所謂立鄆朱晦翁之所謂避父及近世陽明先生之所謂感化非不為衛國處分然終以己之心度聖人之心而其在聖人神化莫測恐未必

止是也徐儼強

魯衛之政章

衛之政父不父子不子魯之政君不君臣不臣卒之哀公遜於
邾而死於越出公奔於宋而亦死於越其不相遠如此徐儼強

苟有用我章

期月而可三年有成必世後仁聖人之作用也大國五年小國
七年大賢之作用也比及三年可使有勇可使足民賢人之作
用也為邦百年可以勝殘去惡善人之作用也古人之用世皆
可以計時而考成非若後人之隨世以就功名者也徐儼強

定公問一言章

此章要着個幾字大凡言幾便有介乎彼此之意如知為君之

難也不幾於一言而興邦乎如字與不幾字字正相應此中
便含有不如此則興邦未必不至於喪邦意如不善而莫之違
也不幾於一言而喪邦乎如字與不幾字字正相應此中便
含有不如此則喪邦者亦未有不可興邦意興喪之源分於此
而興喪之幾亦介乎此夫子數言真為治之藥石

徐敞弦

國語晉文公問於郭偃曰始也吾以國為易今也難對曰君以
為易其難也將至矣君以為難其易也將至矣家語孔子告哀
公曰昧爽風興正其衣冠平旦視朝憂其危難一物失理亂亡
之端君以此思憂憂可知矣君者舟也庶人者水也水所以載
舟亦所以覆舟君以此思危可知矣史記子思言於衛侯曰君
之國事將日非矣君出言自以為是而卿大夫莫敢矯其非卿

大夫出言自以為是而士庶人莫敢矯其非君臣既自賢矣羣
下同聲賢之賢之則順而有福矯之則逆而有禍如此則善安
從生同上

葉公語孔子章

林氏曰石碻之為父而不隱其子厚李璡之為子而不隱其父
懷光弑逆大惡不可隱其事尤重於父子之倫也石碻以父殺
子於理為順李璡以子告父理似欠安然李璡恐其君不知備
而見害於父不是叛父其後又能死之此為得也徐微強

呂東萊曰子之證父先有證父之曲不必問其所證之事也弟
之紆兄先有紆兄之曲不必問其所紆之事也臣之訴君先有
訴君之曲不必問其所訴之事也同上

行己有恥章

子貢問及今之從政是他本心要做的。蓋當時論者皆以才不說德。只說這個便是士了。聖人說才是器。德是器中所容之物。有德而後才為有用。猶有物而後器為有用也。若有才而無德。有器而無物。何所取乎。況今之從政者都是小才。如斗筲。然終日盛量而無合勺。為己有操來撤去。何足算數。蓋根基不立。只做得這般樣人。無可施學問處。不可以進於士。夫子所以寧取硜硜者以此。薛畏齋

不得中行章

狂者有氣魄。狷者有筋骨。狂者如神人之凌虛御空。可望而不可即。狷者如風急天寒之夜。而當門定脚不仆。狂者如鵬搏扶

搖而上者九萬里。狷者如鶴鷺之標致。整潔風格絕塵。然論其規模。則狷者終在狂者範圍之內。徐敬弦

不恒其德章

做不善事的人。其心未嘗不自愧。若或進之也。觀於此詩。可以惺然。故夫子欲人玩其占。薛畏齋

克伐怨欲章

克伐是因己所有而生氣盈也。怨欲是因己所無而生氣歉也。推本言之。又皆由欲而生也。徐敬弦

克伐怨欲不行。是無根之善。有種之惡。雖能力遏其衝。而所謂克伐怨欲者。固在也。一旦防檢稍疎。將投閒抵隙。勃然而出其難者。於是乎不足恃矣。可以為難。不是詞之。詞此非學者正

先難後獲何也

當工夫聖人全不以此教人。或以難為勉然仁為自然大繆。存天理去人欲說者謂為求仁之方克伐怨欲不行夫非去欲之法。乃曰仁則吾不知也。不知除却去欲更有何法可以存仁。微矣微矣。却又點個難字曰可以為難矣。仁則吾不知也。僭謂自其着力處固叫做難。而自其喫力處亦叫做難。如何叫做着。加原憲蓋是個刻苦做人者。克伐怨欲一切剛制。曰既倒之瀾。障而束之使不得行難矣難矣。故曰自其着力處固叫做難。尚有一說古楫桴不息流為江河綿綿不絕。持斧柯解牛者刃遊虛空破竹者無煩着手難易迴然理可槩見。子夏之交戰而癰病亦坐此難矣難矣。故曰自其喫力處亦叫做難。由前之難其所着力處即是其得力處。原憲之所為可許也。由後之難

其所喫力處即是其受病處原憲之所為未可與仁也知克伐怨欲不行者之為喫力而所以求仁者可以照知其用力之方矣李見羅

南宮适問章

禹未嘗躬稼也而論語曰禹稷躬稼而有天下稷未嘗過門不入也而孟子曰禹稷三過其門而不入此可見古人文字之不拘也徐儼弦

愛之能勿勞章

要曉得此是誨不是諫諫者小臣之職誨者大臣之通涵咏誨字自有深味徐儼弦
言愛言忠不特君臣父子為然天以貧賤憂戚勞吾人天之仁

愛也。以災異譴告忠。吾君天之善誨也。愛人以德。師道亦有之。
忠告導交。誼亦有之。即夫子所言忠愛。亦初未必拘於君臣
父子之間也。同上

為命章

禘謀不足取之世叔。世叔不足取之子羽。子羽不足取之子座。
討論其草創而不為矜己之長。潤色其脩飾而不為形役之短。
故能合衆人之能以成有國之美。徐儼弦

或問子產章

彼哉外之。詞人也。內之。詞。徐儼弦

子路問成人章

才質如鉛汞。禮樂如真丹。鉛汞若無真丹點化。不成黃金。忠信

之質未養成之丹也亦勝是郡空鉛汞無用處蘇長齋

晉文公誦章

此是當時一大斷案孟子論春秋曰其事則齊桓晉文夫子有此斷案在胸中所以作春秋每與齊桓而旁晉文又於詩錄木必而唐風不錄晉文亦是此意徐儼然

子言衛靈公章

孔子因靈公之無道而又特取其用人其所用之人皆平日之所不與者而又不沒其如此可見聖人至公之心徐儼然

陳成子章

君曰告夫三子是君下替而不君之三子告不可是臣上凌而不臣徐儼然

以吾從大夫之後不敢不告一句涵許多意思臣之弑君已不待言而鄰國之不可以不討賊君之不可以不命三子三子之不可以不從命皆在其中此等言語自非夫子不能通同上

蘧伯玉使人章

欲寡其過而未能七字意味深長義理凝聚最宜詳玩徐斂弦

君子思不出章

思不出其位此理最妙不惟能盡其分且亦能定其心徐斂弦

疾固也章

固者蔽錮此心之仁故為可疾薛畏齋

莫我知也章

不怨不尤是下學上達張本盖有怨尤之心則滯於物他下學

處更超事物不得無怨尤之心則虛明不累而日用人事間莫非天理心與天一則精微之妙豈恒情所能測哉薛畏齋薛敬軒曰知天地之化育是聖人之心與天為一知我者其天是天之心與聖人為一徐敬弦

子路問君子章

欲立欲達意同脩己少不得在安人上見說脩己以敬己是盡了安人的道理子路少之可見他學問不合一處還說如斯而已則此心全沒個商量學問全沒個着落故夫子以堯舜猶病抑之

衛靈公問陳章

孟子曰孔子厄於陳蔡之間考春秋則其時陳服楚蔡服吳吳

楚交戰無虛歲孔子蓋為楚昭王徘徊陳蔡而厄於兵間也徐敬

賜也女以子為章

多學而識則以聞見牯吾心其機室一以貫之則以吾心統事物其機神徐敬

到一貫依舊不離多學而識上也薛畏齋

一以貫之者他記我多學而識者我記他同上

子張問行章

參前倚衡只是此心常存常目在之、意若把一個忠信篤敬常着在眼前便如司馬溫公常念一中字便是執着了聖門之學不如是故論參前倚衡當在勿忘勿助之間參前倚衡其功夫故然後行其機順只在參前倚衡處做下工夫到得發適見

遠出身加民便如中流自在更不費推移之力矣徐儼弦

顏淵問為邦章

顏子克己復禮所立卓爾夫子告以四代禮樂足矣而復有鄭聲佞人之戒何哉舜之授禹允執厥中足矣又益之以三言又繼之曰無稽之言勿聽弗詢之謀勿庸夫子之意即授之之意徐儼弦

孔子言王道只言禮樂如夏時商輅周冕韶樂是也孟子言王道只言政事如衣帛食肉井田學校是也同上

舜咨十二牧終于難壬人命九官終于聖讒說孔子答為邦終于遠佞人一也同上

蔡氏曰周人建子先儒議論紛々不一有謂時月俱改者漢孔

安國鄭康成之說也。有謂改月不改時者。宋程伊川胡文定朱晦翁之說也。有謂時月俱不改者。蔡九峯之說也。至於元儒吳仲達陳定宇張敷言史伯璿吳淵穎汪克寬輩。則又遠宗漢儒之說。而力詆蔡氏之非。謂以言書則可從。以言春秋則不可從。是將何所折衷。嘗得青齋讀書錄。見其所作周正辨。謂周人未嘗改時月。而獨以建子為歲首。是以此月為正朔。非以此月為正月也。且歷引易詩春秋周禮論孟及汲冢周書史記漢書。以明其必然者。今亦不能盡述。其大畧謂正朔與正月不同。正朔者十二朔之首。史官紀年之所始也。正月者十二月之首。曆官紀年之所始也。故皆可謂之歲首。前乎商之建丑也。書曰惟元祀十有二月。商之正朔以十二月為歲首。而非以十二月為正。

月也。後乎秦之建亥也。史謂秦既并天下始改年。朝賀皆自十月朔。故曰元年十月朔。是秦之正朔以十月為歲首。非以十月為正月也。由是推之。則周人之建子以十一月歲為首。而非以十一月為正月也。蓋周之正朔以子月為首。而曆數仍以寅月為首。但史官紀年必始于冬十一月。所以遵周正朔也。春秋紀年則始于春王正月。所以垂法萬世也。是春秋之于魯史未嘗改其時月。但其編年所始之月為不同耳。曰若然。則周曆之紀皆夏時矣。而又何必曰行夏之時哉。曰商周曆數雖與夏同。而正朔則與夏異。商周之正朔曆數分而為二。揆之于理固有未順。惟夏之正朔曆數合而為一。以統言之。則為人。以時言之。則為春。以月言之。則為正。揆之于理無不順。故舉之以為萬世法。

春二月無水何
也書史又何以
名春秋

也。愚按此說實本於元儒朴卿呂氏所作春秋或問以為周禮有正歲正月之文其說尤為詳備足破千古之疑蔡氏所引即其故說同上

蔡氏又曰春秋春王正月即是夏時之春夏時之正月時月俱不改但用以十一月為歲首孔子作春秋不始書冬十一月而首書春王正月便是行夏之時

後儒因顏子問為邦孔子酌四代禮樂以告之因以為有王佐之才有天德便可語王道顏子之無忝王佐明矣然此特夫子論耳非顏子之見諸設施也昔人謂南面而蒞天下所共理者將與相耳相為天子得人于朝廷將為天子得文武士于幕下求天下無治不可得也堯憂舜舜憂禹為學求人汲汲皇皇孔

孟之心千載如見。孟除却孳靈毓秀為世生傑。雖天地亦無別有經綸以維持世界也。家語記孔子曰：自吾得顏回而門人益親。只門人親處。是有多少作用。此顏淵死所以子哭之慟也。蓋佐夫子之行道者。顏子也。窮居則佐其師以求友。達處則必能佐其君以求賢。李克所謂窮視其所興。達視其所舉。所興者如此。則所舉者可知矣。此則真所謂佐王之才也。又子畏於匡。顏淵後子曰：吾以女為死矣。曰子在。回何敢死。只子在兩字。是有多大識見。恰好與天之未喪斯文也。匡人其如予何。同一主見。何須說到上告天子下告方伯。審如是其所見者淺矣。其所以自衛者已疎矣。回何敢死一句。却又何等擔當。何等委曲。此又所謂佐王之才也。終日如愚。到此倉皇急迫之際。氣定神閑。萬

兩千斤道出一句來真見力量 李見羅

人無遠慮章

遠慮者此心無一息一處之不到也。一息不到則有一息之憂。一處不到則有一處之憂。所以君子有終身之憂無一朝之患也。薛畏齋

不曰如之何章

如之何如之何曾在心上理會一番便差了也好。若心亡的人便沒奈何。薛畏齋

有一言而可以章

不欲處即是非理。非理動處真心自知得恰依舊放過去。此是私欲盛了真心作主不定不能如心。故學問之道只是不欲處。

能勿施始得得了真心便一了百當下學上達只此一事故可以終身行之子貢被聰明使了連真心都瞞昧却故夫子欲其反諸心而求之此與非爾所及意同亦求仁之方也工夫重在勿字上薛畏齋

人能弘道章

人心覺處就是道。纔覺這道便可參天地育萬物。何弘如之。若離人則無心。離心則無覺矣。道從何處來。如何弘得人。故以人弘道則可以道弘人。則不可。凡離性求道者皆以道弘人者也。薛畏齋

天下只有此兩種學問。人弘道聖賢之學也。道弘人異端之學也。以道弘人則道自道。我自我模擬。雖似不離知識之私。形氣

之牯。安能超然軀殼之外。而與天地同其大也。同上

人能弘通。這人便可喚做道。以道弘人。道與我不相干也。依舊血肉之軀而已。同上

記曰。天地之性。人為貴。書曰。人為萬物之靈。易曰。神而明之。存乎人。人者。天地間靈物。惟靈能覺。惟覺能運。惟覺能轉移。惟覺能深入。惟覺能充拓。惟覺能變化。故天地賴人之心靈。裁成範。圍。佐其所不及。人物賴人之心靈。開發宰輯。各安全於天地之間。日月賴以明。山川賴以奠。三綱賴以立。五典賴以敷。九疇賴以叙。八法賴以脩。自有宇宙。繩牒來。四千年到今。此道堂。鬼。於天下。豈非人之力而何也。若夫道者。無一息不行。天壤無一日不在人間。其體自然。無思無為。其物混成。不增不減。其

運無心。無成無毀。自有宇宙四千年到今。得之者聖。失之者狂。
順之者治。逆之者亂。通由人。塞由人。用亦由人。不用亦由人。用
之大由人。用之小亦由人。道安能主張充拓。以大斯人於天下。
故道常虛。虛中有靈。獨鍾於人。人常靈。靈却能透入六虛。去無
所不極。唐虞之道。萬古稱隆。是堯舜弘之。非道弘堯舜也。洙泗
之道。萬古稱極。是孔子弘之。非道弘孔子也。人之力量能弘道。
乃所以弘人。人弘道。孟弘道弘則非人不能也。若自肯擔當。自
肯獨往。即堯舜孔子來。尚有無窮世界。無限精微。待我輩充拓。
興言至此。能不慨如。故曰待其人而後行。此孔孟自任之至也。

沈長水

吾嘗終日章

終日不食終夜不寢聖人也曾從辛苦中思索一番過來到得後面舉眼都是這個道理比那思的時節較更着實故曰不如學其實無聖人之思不可以言聖人之學學者不可徒徇其言又墮於不思的一邊去了薛畏齋

當仁不讓章

見孺子入井而怵惕形焉此是好事那時節便是師在面前須着去做不讓與他這個心是人如此個一般無所為而為者這便是擔當仁處此是聖人指出人心一個當仁的本體示人言如此乃可以為當仁也蓋曉得這個意思則當仁的道理便在面前不然則當面蹉過可惜也已薛畏齋

師冕見章

朱震謁謝上蔡謝曰好待與賢說一部論語少選曰聽說論語
首舉子見齊衰章及師冕見章曰聖人之道無顯微無內外由
灑掃應對進退而上達天道教養一以貫之一部論語只恁地
看徐徹弦

季氏將伐章

玩夫子此章憫然有公室之思一以懼季氏使不至於逼上所
以安魯一以責冉求使不至於逢君亦所以安季氏本為貪利
乃曰除害故為冉求之飾辭有國有家以諸侯大夫言也指魯
君季氏也曰患因季氏之為子孫憂者言曰貧寡因季氏之欲
伐顯史言曰均安因季氏之不得於魯君者言徐徹弦
憂不在顯史而在蕭牆之內則憂不在子孫而在季氏之身季

孫之憂正與子孫之憂憂字相應其後畔費者出於公山墮費者出於孔子則季孫之憂果不在顓臾而在蕭牆之內也同上

天下有道章

陳止齋曰此章備春秋之終始禮樂征伐自天子出是春秋以前時節自諸侯出隱桓莊閔之春秋也自大夫出僖文宣成之春秋也陪臣執國命襄貽定哀之春秋也徐微弦

始之以有道終之以有道亦足以見夫子寓意之深當時政在大夫若三桓六卿七穆之專正世道之一變故夫子不能無有道之思然自以匹夫而執二百四十二年南面之權夫子非議政也欲反其在大夫者而歸之於天子也故曰春秋天子之事同上

益者章

益字有薰陶漸染日進而不自知之意損字有浸淫漸漬日退而不自知之意漢人有曰種樹畜養不見其益有時而長磨礪砥礪不見其損有時而盡此可以見損益之義徐敬弦

蔡傳解曰便者順人所欲辟者避人所惡因人好惡而為超避便是直此頗與朱傳不同同上

便辟便佞皆便也便於人則人損驕樂晏樂皆樂也樂於己則已損天下之事未有不成功於憂患而敗於安樂者同上

見善如不及章

見善如不及見不善如探湯是人之真性如此隱居求志行義達道是從真性上建立起來有此真性擴而大之方能心境合

一神化無方耶看來誠於好惡如孔子所謂善人有恆孟子所謂善人信人求志達道則聖人君子美大聖神之流耶薛畏齋志與道都在吾性中隱居乃所以求吾之志行義乃所以達吾之道外面的物事就是裏面的物事那個真性直包羅天地充塞無間人；有此真性那個能充擴得到這田地故曰未見其人也同上

齊景公有馬章

景公千駟不如夷齊之饑死顏子一瓢乃同禹禩之用世學者於此可以深省徐敬弦

陽貨欲見章

使陽貨欲見而即見之有餽而不往拜之往拜而不問其亡遇

諸途而或避之皆非也。孔子處之却一，有節度其答之也。立談教誨從容不迫，直而不至於亢，遜而不至於屈，真可以為處惡人之法。徐敬弦

公山弗擾章

如有用我，其為東周。聖人作用神化莫測，豈可以尋常槩論。近世林氏乃謂夫子見用必因陪臣還政於大夫，因大夫還政於諸侯，因諸侯還政於天子，所以說為東周。比如稱貸之人，挈物以償人，由甲以還之乙，而又由乙以還之丙，其為說之顛，有以待辨而明者也。而以擬聖人之施為，亦謬矣。徐敬弦

聖人道大德宏人，傾慕公山弗擾叛逆之臣，身處死地，思量只有孔子救得他，他來召子亦只為救死之計。如今之罪人去

此段可去

禮佛一般。思量只有佛超度得他。故曰豈徒哉。言他必定辦得一片信心來也。孔子到那裏。必將陳君臣之義。以感動其心。使之釋邑請罪。就死司寇。那時節。季桓子亦必感動。知得家臣不可叛大夫。大夫亦豈可叛諸侯。必將歸政魯君。魯君亦因此感動。脩舉周政。以事周天子。一舉措間。而名分正。綱紀立。政治脩。文武周公之治。赫然復建於東方矣。豈不可以為東周乎。齊

由也女聞六言章

蔽只是此心被私意遮隔了。私意遮隔一層。此理便通達不去。隨分你外邊做得近似。只是氣質之偏。不是達德。故須學以去蔽。然學又須好學而不好。只是口耳之私。反增長得蔽去他不得。好學如何。只是隨時隨事有得於心。如誦詩。便有個興觀羣。

怨的意思見賢便有個思齊的意思見不善便有個內自省的
意思這個幾微處一毫私意也容不得如此則真心發見氣質
不用事這個真心便是德如見孺子入井而有怵惕之心便是
仁這道理分：曉：不可陷不可罔便是知實有此理無所為
而為便是信順此理而達之便是直發之勇決處便是勇此理
不屈不撓處便是剛皆不從外得者此之謂好學子路知學未
必知好未免滯於口耳則理未透徹其蔽有所不免矣夫子之
言亦因其病而藥之薛畏齋

小子何莫學章

愚按六經皆稽實待虛之言苟讀詩者有所感發則興觀羣怨
事父事君隨所玩習皆可自得矣必請陟岵而後可以言事父

讀四牡而後可以言事君也。如王子繫好晨風而慈父感悟。裴安祖講鹿鳴而兄弟同食。晨風鹿鳴亦豈父子兄弟之詩耶。且可以興可以觀。亦隨讀者之有觸而能自得之。又安可謂篇。皆有之也。徐敬修

禮云禮云章

禮云一章且不說出敬和二字。令人一唱三歎。深思而自得之。其味深長。君子語道所以貴於涵蓄。徐敬修

鄉原二章

上章以似德而亂德。故曰德之賊。下章可以蓄德而不存。故曰德之棄。賊之云者。若加之以傷殘。棄之云者。若委之於道途。徐敬修

鄉原章

鄉原同流合污似權而非權害於權者也其忠信廉潔似經而非經害於經者也薛畏齋
色厲內荏是穿窬之盜鄉原是劫殺人的賊不畏人知者同上

鄙夫章

王氏曰有心於輕功名富貴者其流至於無父無君有心於重功名富貴者其流至弑父與君徐倣弦

予欲無言章

天何言哉一節早是把真機盡洩方欲無言已自言盡了更又何言徐倣弦

宰我問三年章

三年為禮三年為樂此是外面把持的學問他以食稻衣錦為

安未必是他真心。蓋他認得這個事該做就做了。何暇求諸心。然亦可見務外學術驅率天下能使人喪其真心如此。畢竟喪不得。如夷子思以易天下而厚葬其親。畢竟到真心上過不得。處依舊不肯。此異端之所以不能勝正道。而先王之制所以至今不墜也。夫子說食旨不甘。聞樂不樂。居處不安。不管三年與晷。是宰我之所必有。既有此心。豈得安於食稻衣錦。亦可逆知其必不安也。兩言汝安則為之言。看你到那時安不安也。末節是推所以不忍不安之故。決言宰我既逃不得。要短也有不能。蓋子之所以不忍不為者。乃至愛根心而然。非有所強也。此宰我之同情。宰我既與人同其愛。又安能與人異其情乎。薛畏齋禮樂以養吾心之中。中和是人情恰好處。如有三年之愛。則

通服三年之喪。此禮樂之本原。儀文度數之所從出也。宰我不求諸心之所安。而從事於儀文度數之間。以求免於崩壞抑木矣。同上

飽食終日章

飽食終日。無所用心。到博奕使用心。然則終日之間。心從何處去。博奕之時。心從何處來。無他用。與不用。即人若能回頭轉腦。都如博奕之用心。則虛靈知覺。無處不到。戒慎恐懼。無時不然。入聖亦不難矣。此是一個提省人心的大機括。學者讀此。便當醒然。孟子引好貨好色之心。達天德亦此意。薛畏齋

君子尚勇章

子路曰。君子尚勇乎。問得來粗。夫子以為亂。為盜。答之應得亦

此必初見夫子時事也。及問強而夫子答之則先之以南方之強而終之以君子其進之矣。徐儼

君子亦有惡章

君子亦有惡。賜也亦有惡。兩亦字俱當玩。夫子所惡惡人之不善者。子貢所惡惡人之似善而非善者。徐儼

楚狂章

欲與之言亦只是鏡中看花。未知所言者何事。徐儼

長沮章

是知津矣四字含蓄有味。桀溺比長沮之言發露殆盡。夫子只就桀溺之言反之。而長沮亦因以見吾非斯人之徒。與而誰與。便見聖人容受天下之量。天下有道某不與。易便見聖人幹旋。

天下之權徐敬弦

周有八士章

三仁去而殷墟八士生而周熾記者特記於是篇之始末以見商周興廢之故而曰殷有三仁周有八士亦因以見三仁之不幸而值其衰八士之幸而際其盛皆不為無意云徐敬弦
上章以魯初之事叙於魯衰之後此章以盛周之事叙於衰周之時皆傷今思古之意也同上

士見危章

見得喪祭皆言思而見危獨不言思者蓋死生急迫之際須有激昂慷慨之氣方能致命一有徘徊顧念之心則不能矣所以着不得思字徐敬弦

執德不弘章

執德不弘的人得一善自以為足有一善便要人知說他不善便不能容受人不知便有所不滿此其胸次狹隘安能悉有衆善信道不篤的人其初既見得是少間又被人搖惑有所改移或移於是非或移於利害此其胸中眩亂安能服膺勿失此所以不能為有無也有無當就道德言不以人言

徐敬然

執德不弘二句無病焉能為有二句便有病聖人也說執德弘信道篤但不以有無子張分明着事說他意說無所不執無所不信之謂有執而不弘信而不篤這所執所信還有限不是道德之全體算他不得是有一無所執一無所信之謂無他如今亦有所執亦有所信不是全然無見的算不得他是無以有無

多寡說道德則德非根心道非率性之謂矣若根心之德須是無所執乃能無所不執率性之道無所信乃能無所不信蓋人心原無一物人性上亦添不得一物故也豈可以有無言哉故添着下句便有病薛畏齋

日知其所亡章

日知其所亡尚不難至月無忘其所能方是難知所亡是用力處無忘所能方是得力處人多是忘了又從頭做起所以常如此不能長進然所謂無忘亦是得一善服膺弗失之意若只是博聞強記亦是為心之累徐敬菴

大德不踰章

事則有大小矣心有大小乎哉小節之失畢竟是心病說不得

可也 薛畏齋

子夏之門人小子章

子游子夏之學俱是分本末為兩段事。子游之意以為教人以末就當教之以本。如何專把末教他。子夏之意以為本末兼該是聖人事。教學者須當先教以末後教以本。其實皆非也。本就在末裏頭。精義入神就在灑掃應對裏頭。聖人教人都是灑掃應對下學的事。其精義入神待學者之自悟耳。可以神會而不可以言傳者也。孰謂末之外別有本之可言哉。薛畏齋

孟莊子之孝章

獻子歷相君五十年。魯人謂之社稷之臣。則其所用之臣必實所行之政必善。莊子年少嗣立。又與季孫宿同朝。宿父文子忠

於公室。宿不能守而改之。莊子乃獨能不改父之臣與父之政而終身焉。此夫子之所謂難。徐敬強

孟氏使陽膚章

得情而喜則太刻之意。或溢於法之外。得情而矜則不忍之心。常行於法之中。徐敬強

喜心生於任法。任法者有時而或濫。矜心本於好生。好生者終歸於無刑。同上

君子之過章

君子之過亦有所不同。或進脩之功未能遽底於純而一念之雜。雖盛德無以自免。蓋有不自知焉。而或罹於過者。若顏子之過是也。或事變之來未必盡如吾意而兩難之際。雖善道無以自

全又有不得已焉而冒有其過者若周公之過是也

徐敬弦

衛公孫朝章

子貢之答太宰則謂其縱諸天其答公孫朝則謂其學諸人縱諸天者夫子之所以將聖學諸人者夫子之所以益聖

徐敬弦

堯曰章

堯舜揖讓湯武征誅是帝王之大事故篇終及之許大天下堯舜以之授受其所囑付只是四三言而止至舜之授禹又更無別說此可以想見當時聖相承精神契合宇宙清寧氣象至湯之伐桀便去上請天命下告諸侯却費辭說然亦只陳之誓告而已至武王伐紂便有許多收拾人心扶植風紀之事却費氣加比之湯時又自不同此可見世道人心之變更帝王之所

以隨時區處者不容不如此也徐敞注

予小子履六句見上帝命討之嚴而脫然無利天下之心朕躬四句見在己寄托之重而恐然有任天下之懼同上

紂為天下逋逃主所用皆是惡人故武王伐商之初便去加富善人把此做個第一件事即如漢高入關除秦苛法此是帝王收拾人心之要術同上

周有大賚以下夫子零碎收拾或舉其詞或述其事湊成武王一段事實同上

堯曰一章

事各有理中也者得其理而時措之謂也堯舜之禪受湯武之放伐孔子之所謂五美皆事也堯舜禹湯武王孔子得其理而

措之則為中。謂之寬信敏恭。謂之美。苟不得其理而措之不時。則惡矣。事之美惡係於心之中與不中。措之時與不時而世之治亂學之得失。君之仁暴人之聖愚皆於此分。堯舜禹湯武王孔子或達而行道於上。或窮而明道於下。不過以中道相傳而已。中也者。千聖相傳之心法也。一部論語只說得一個中字。欲人得此理於心而時措之。故記者於篇終提出一個緊要字眼。示人以明聖學之所傳者一於是而已。明此義則事有得不然則是侮聖言也。

薛畏齋